

四庫全書

史部

欽定四庫全書

史部

山西通志卷五十三
四

詳校官監察御史_臣查善長

檢討_臣德生覆勘

總校官進士_臣朱鈐

校對官助教_臣蔡鎮

謄錄監生_臣王鏐

欽定四庫全書

山西通志卷五十三

武事

四

寧武府

寧武縣

周赧王九年趙武靈王北逐樓煩斥地自代并陰山而
下十九年秦蒙驁攻趙拔新城漢高帝十年九
月陳豨韓信合兵寇代雁門太尉周勃將軍樊噲擊

之於樓煩大破之復定所劫略郡縣 建武三年盧
芳將尹由守繁峙驃騎將軍杜茂上谷太守王霸擊
之不利引兵屯樓煩 蜀漢建興十一年六月魏并
州刺史畢軌以居雁門鮮卑步度根與軻比能解讐
表出兵外威比能內鎮步度明帝曰步度非實有貳
心軍出則驚合為一矣勅軌軍不得過勾注而軌已
進軍陰館遣將魏尚董弼先出塞軻比能遣子迎度
根因與尚弼遇戰於樓煩尚弼敗沒步度根遂叛出

塞遇戰樓煩是軻比能子業進陽方口也然而不
南入者魏兵強也軻比能志殊叵測隋大業八年
西突厥處羅可汗至分其部為三使處羅弟大奈將
萬餘居樓煩十三年劉武周陷樓煩據汾陽宮

宋太平興國四年遼乾亨元年也保安軍使尹憲克
嵐州入朔州攻寧武軍破之殺其軍使獲人馬器械
甚衆潘美兼三交都部署三交西北三百里名固
軍其地險阻為北邊咽喉美潛師襲之遂據有其地

因積粟屯兵以守之自是北邊以寧

固軍當在靜
樂寧化間明

何塘吳道寧墓誌弘治十一年陞山西按察司副使

奉勅整飭雁門等三關兵備創築寧武新城設寧武
所及沿邊堡寨俱募軍充實武備一新邊人有賴

王道中翟鵬行狀公委軍門聽用主事劉燾督同各
鎮主客擺邊官軍壯夫等各就三關分定地方修築
邊牆挑挖壕塹各十萬丈營盤二十處周圍牆共三
千一百二十五丈墩一十一座敵臺六座修補舊牆

壕塹不可勝計 正德九年小王子入至關守備陳
經戰沒十四年自朔州入至龍灣 嘉靖九年諳達
至龍灣十五年由崖頭入至寧化三馬營十九年八
月諳達部人與大同折箭由井坪朔州抵雁門破寧
武關入岢嵐興縣交城汾州文水清源二十八年八
月由朔州入至王野梁副總兵丁璋游擊周宇戰沒
遂深入太原三十八年諳達犯宣府總兵趙國忠相
持於沙嶺堡寇大營徙而西直抵寧武大同總兵官

陳鳳伺寇將退率副總兵林椿游擊焦澤張騰等合
進至鷓兒嶺伏發諸將戰彌日各被創會大風雪寇
斂衆還營明日復戰斬一長寇乃退 崇禎間三關
土賊王剛起後降七年巡撫戴君恩以迎春召剛宴
殺之汾州叅將劉光祚勦敗剛餘黨斬四百餘級甲
申二月十五日闖發太原數日抵寧武總兵周遇吉
設伏邀擊闖怒益進遇吉與寧武道王尹懋嬰城固
守闖百道攻擊乃陷遇吉尹懋死之闖賊薄寧武關

傳檄五日不下且屠總兵周遇吉悉力禦守大砲擊殺賊萬餘人會火藥盡或言賊勢重可歛也遇吉日戰三日殺賊且萬若輩何怯耶能勝之一軍盡為忠義萬一不支縛我以獻若輩可無恙於是開門奮擊殺賊數千人賊懼欲退或為賊策曰我衆彼寡但使主客分別以十擊一蔑不勝矣請去帽為識見戴帽者擊之遞出戰不三日可殲也賊引兵復進迭戰脫帽以自別官軍大敗遇吉闔室自焚揮短兵力鬪被

流矢牙兵且盡見執罵賊賊於市磔焉遂屠寧武嬰
稚不遺李自成既殺遇吉歎曰使守將盡周將軍者
吾安得至此

偏關縣

趙襄子取藺郭狼之地遂北伐林胡敗之於荏 趙武
靈王命代相趙固主林胡致其兵復北伐破之 漢
高帝七年太僕夏侯嬰從擊代至武泉雲中 景帝
中六年六月寇入雁門至武泉入上郡取苑馬吏卒

戰死者二十人 元光二年夏五月寇入武州塞未
至馬邑百餘里走出 明宣德四年烏梁海由段家
村入總兵李謙設伏於黃草梁擒其酋伊克龜爾等十
年由七里溝入指揮江海等戰敗死正統元年復由
七里溝入指揮馬貴等敗其前鋒乃退十四年額森
至大樹塢景泰初烏梁海駐櫃山數犯偏頭成化元
年和碩至楊勉堡十八年復入守備錢能敗十九年
右副總兵周璽以偏頭去太原遠請改分守為鎮守

又以鎮守不當聽節制乞易總兵銜從之弘治十四年入七里溝十五年寇掠偏頭關正德七年小王子入總兵周神敗績於炸子塢守備周鏞等皆沒九年再入十一年復入十四年由朔州入至龍灣十五年正月由朔州入至三义溝嘉靖八年十一月諸達由大同入至土棚堡副總兵李瑾敗績於劉海莊十一月小王子糾河套七萬餘騎由井坪入遂掠朔州至偏頭關乃退九年正月復入瑾伏兵龍灣出縱擊敗

之由是終瑾任不再犯十五年八月由寺塢入至馬
站營九月由巖頭溝入十月復由巖頭溝入一歲凡
三犯十六年八月由平魯衛入至老營十九年八月
由朔州入二十一年七月由朔州入叅將張守忠邀
擊於六支村戰死隆慶元年十月黃台吉寇偏頭關
逮繫鎮巡劉燾王之誥副叅田世威等命閣部與文
武臣商禦寇策

神池縣

周赧王十九年秦使蒙驁攻趙拔新城狼孟 漢高祖

七年塞北左右賢王信將王黃等屯廣武以南至晉

陽與漢兵戰漢兵大破之追至於離石復破之

師古曰離

石西河之縣

塞北復聚兵樓煩西北漢令車騎來擊常敗

走漢乘勝追北聞北部居代谷上居晉陽使人視之

還報曰可擊遂至平城上白登 魏青龍元年六月

保塞鮮卑大人步度根與叛鮮卑大人軻比能私通

并州刺史畢軌表輒出軍以外威比能內鎮步度根

帝省表曰步度根已為比能所誘有自疑心今軌出軍適使二部驚合為一何所威鎮乎促勅軌已出軍者慎勿越塞過勾注也比詔書到軌已進軍屯陰館遺將軍蘇尚董弼追鮮卑比能遣子將千餘騎迎步度根部落與尚弼相遇戰於樓煩二將沒步度根部落皆叛出塞與比能合寇邊遣驍騎將軍秦朗將中軍討之寇乃至漠北東魏興和三年四月蠕蠕阿那瓌奉馬千匹為聘禮遣使迎蘭陵郡長公主於新

城之南齊神武躬送公主於樓煩之北 唐武德四

年定襄王李大恩言突厥饑馬邑可圖詔與殿中少
監獨孤晟共擊之晟後約大恩不敢進屯新城頡利
自將數萬騎與劉黑闥合圍之大恩没士死者數千
人進擊忻州為李高遷所破 八年頡利攻朔州與
代州都督蘭蒼戰新城謨敗績於是張瑾兵屯石嶺
李高遷屯大谷秦王屯蒲州道 乾符三年雲中守
捉使李克用偕程懷信王行審蓋寓李存璋薛鐵山

康君立等募士萬人趨雲州次鬪雞臺城中執防禦
使段文楚至殺之據州以聞朝以振武節度使李國
昌為大同軍防禦使國昌不受命而與黨項戰未決
大同川吐渾赫連鐸襲振武盡取其資械國昌窮挈
騎五百還雲州州不納鐸遂取之克用轉側蔚朔間
裒兵纔三千屯新城鐸引萬人圍之隊而攻三日不
拔鐸兵殺傷甚國昌自蔚州來鐸引去六年詔昭義
李鈞為北面招討使督潞太原兵屯代州幽州李可

舉會鐸攻蔚州國昌以一隊當之克用分兵抵遮虜城拒鈞天大雪士瘁仆鈞衆潰還代州軍遂亂鈞死於兵廣明元年以李琢為蔚朔招討都統率兵數萬屯代州克用使傅文達調蔚朔兵朔州刺史高文集縛以送琢琢進攻蔚州國昌敗與克用舉宗奔韃靼

元已卯穆呼哩以蕭特穆爾等出雲朔攻降岢嵐

火山軍

當繇神池五寨

明嘉靖八年十二月諳達入偏頭關

副總兵李瑾戰於劉海莊不利三十二年九月寇至

神池總兵李涑追擊至大蟲嶺捨騎逐賊賊甚窘會諸軍急擊而囂陣亂涑敗沒

五寨縣

魏領軍將軍元乂遣弟洪業召武州人姬庫根等與之聚宴遂誓盟欲令為亂朝必以乂為大將軍往伐因共為表裏乃厚遺根等遣還州與洪業買馬 宋咸平六年遼統和二十一年也河西內屬折勒厥麻等三族請以精兵千人馬三百備征討詔撫諭唐初突

厥入詔并州總督劉世讓以兵屯雁門世讓馳騎八百赴之而可汗軍大至乃保武州可汗與高開道苑君璋合衆攻之城數壞輒立柵完拒鄭元璫先使可汗可汗使來說世讓叱曰丈夫奈何作說客耶久之寇引去元璫還具道其忠賜良馬金帶 金貞祐二年武州屢經殘毀刺史楊沃衍甫入州二月元兵即來攻死戰二十七晝夜不能拔乃退既而朝廷以武州終不可守令沃衍遷其軍民駐岢嵐州 興定三

年八月戊辰元兵下武州軍事判官郭秀死之明
洪武二年都督汪興祖擊下武朔二州擒知院馬廣
等六百三十四人六年北兵入武朔大將軍徐達遣
陳德郭子興擊破之

澤州府

鳳臺縣

周靈王二十二年齊侯伐晉取朝歌為二隊入孟門登

太行封少水

即沁水

赧王五十二年秦白起伐韓取南

陽攻絕太行道 韓惠王十年秦擊韓於太行上黨

降 秦昭王四十四年白起攻太行道絕而韓之野

王降 秦莊襄王元年使蒙驁伐魏取高都 漢建

武元年劇賊集太行山高都長鮑昱討平之 後魏

建義三年九月丙辰爾朱兆至建州刺史陸希項拒

守城陷盡屠之 中興二年四月丙子廢帝建州大

都督張悅舉城降 東魏天平元年六月高歡遣三

千騎鎮建興益河東兵 西魏大統十六年東伐帥

都督司馬喬請為前鋒遂入建州破東魏將劉雅興
拔其五城 周太祖以行正平郡事楊擲有謀略堪
委邊任乃表行建州事時擲據東雍州建州遠在敵
境三百餘里然擲威恩夙著所經之處多並贏糧附
之比至建州衆已一萬東魏刺史車折于洛出兵逆
戰擲擊敗之又破其行臺斛律俱步騎二萬於州西
大獲甲仗及軍資以給義士繇是威名大振東魏遣
太保侯景攻陷正平復遣行臺薛循義率兵與斛律

俱相會於是敵衆漸盛擲以孤軍無援且腹背受敵
謀欲拔還恐義徒背叛遂僞太祖書遣人若從外送
來者云已遣軍四道赴援因令人漏洩使所在知之
又分土人義首令領所部四出抄掠擬供軍費擲分
遣訖遂於夜中拔還邵郡朝廷嘉其權以全軍即授
建州刺史 齊晉州敗後雷顯和為建州道行臺左
僕射周使其子招之顯和禁其子而不受聞鄴敗乃
降 唐武德元年王須將魏刁兒據澤夏竇建德襲

擊破之 竇建德救王世充凌敬說曰悉宜濟河攻
取懷州河陽使衆將居守更率衆鳴鼓建旗踰太行
入上黨先聲後實傳檄而定漸趨壺口騷駭蒲津收
河東之地此策之上也建德妻曹氏亦言自滏口道
乘唐之虛連營漸進以取北山則鄭難自紓世充以
金帛啗夏諸將竟奪其謀而建德敗 史思明至東
都韋陟欲加兵陝州退守潼關李光弼曰非上策也
不若移軍河陽北阻澤潞據三城以抗之勝即擒之

敗即自守表裏相應使賊不敢西侵此則猿臂之勢也遂敗思明於河陽 唐肅宗時左清道率曲環將兵守澤州破賊銳將安曉 光化二年李罕之以潞州降梁丁會自河陽攻澤下之 李罕之悉河陽兵攻晉絳河南張言夜襲之罕之奔晉晉表澤州刺史使李存孝以兵三萬助罕之攻言罕之敗於沅河乃之澤州日以兵鈔懷孟間啖人為食居民屯聚摩雲山罕之悉攻殺之立寨其上時人號曰李摩雲 晉

兵破夾城梁右千衛上將軍牛存節等以餘兵歸至
天井關聞晉攻澤州存節曰澤州要害不可失也舉
策而先士卒隨之澤州人已焚外城將降晉聞存節
至乃稍定存節入城助守晉人穴地道以攻之存節
勇士數十亦穴地以應之戰於隧中敵不得入晉人
解去後唐同光元年梁取澤州裴約死之後晉
天福十二年五月史弘肇克澤州契丹將崔廷勳遁
宋建隆元年夏四月癸巳昭義軍節度使李筠起

兵遣人殺澤州刺史張福往據其城求濟師於劉鈞
鈞率兵與遼兵數萬援之詔遣歸德軍節度使石守
信往討五月庚子遣昭化軍節度使慕容延釗彰德
軍節度使王全斌將兵出東道會守信癸卯石守信
與監軍李崇矩敗李筠於長平斬首三千級又攻大
會砦下之甲辰命諸道進討丁巳詔親征命天平軍
節度使韓令坤屯兵河陽己未發京師丁卯石守信
高懷德破筠衆三萬於澤州南降者三千餘擒偽節

度范守圖殺筠監軍使盧贇及北漢援兵之降者數
千人筠遁入澤州戊辰太祖至列柵圍之筠龍捷使
王廷魯吐渾留後汾州團練使王全德率所部自昭
義來降筠益失援太祖督戰六月辛未拔澤州筠赴
火死筠懼而遁乙酉伐上黨丁亥筠子守節以城降
赦之上如潞甲午永安軍節度使折德扆破北漢沙
谷砦秋七月戊申上至自潞 李筠起兵吳廷祚曰
潞城巖險未易破也筠素勇而輕若速擊之必離上

黨來邀我戰猶獸亡其藪魚脫於淵乃可擒也閤卽
仲卿又說筠曰西下太行直抵懷孟以塞虎牢計之
上也筠不能用宋太祖征潞戒石守信等曰勿縱李
筠下太行急引兵扼其隘破之必矣 建隆初征李
筠西京留守向拱迎謁至汜水言於上曰筠逆節久
著兵力日盛宜急濟大河踰太行乘其未集而誅之
緩則勢張難為力矣上從其言卷甲倍道趨之筠果
率兵南向聞駕至駭走澤州城守遂見擒 驍武副

指揮田紹斌從崔彥進征李筠攻大會砦破之又敗
筠於澤州茶碾村筠退保澤州紹斌鑿壕圍守流矢
中左目殺筠軍益衆奪其鎧甲 宋初征李筠筠退
保澤州城固可守攻之未克太祖詔馬全義賜食御
榻前問計對曰筠守孤城併力急攻立可殄滅倘緩
之適足長其奸耳太祖曰是吾心也即麾兵急擊之
全義率敢死士乘城攀堞而上飛矢貫臂血流被體
全義拔鏃臨敵士氣益奮遂克其城 靖康元年詔

以浙西兵往河東防秋金人攻澤州東南第三將士
王言畢力守禦金兵日增他將力屈城西南遂陷乃
使親卒持劍歸報巷戰而死 五月太原圍未解种
師中戰沒种師道病歸耿南仲曰欲援太原非李綱
不可上以綱為河東北宣撫使綱辭或曰此非為邊
事欲緣此以去公則都人無辭耳許翰書杜郵二字
遺綱綱惶恐受命上手書裴度傳以賜宣撫司兵僅
一萬二千人進至河陽望拜諸陵行次懷州詔罷減

所起兵綱奏太原之圍未解河東之勢甚危秋高馬肥敵必深入使防秋之師果能足用不可保無敵騎渡河之警況臣出使未幾盡改前詔團結之兵悉罷減之今河北河東日告危急未有一人一騎以副其求甫集之兵又皆散遣臣誠不足以任此不報御批日促解太原之圍而諸將承受御畫事皆專達宣撫司徒有節制之名綱上疏極諫節制不專之弊時方議和詔止進兵尋命种師道領宣撫司事召綱赴闕

師道亦尋卒 建炎元年七月河北招撫使王彥及
金人戰敗績奔太行山聚衆其裨將岳飛引部曲自
為一隊 金天會末太行山賊往往嘯聚知澤州王
伯龍皆平之 天眷元年南京馬步軍都指揮使徐
文破太行賊梁小哥 興定二年十月丁巳元兵攻
澤州五年正月丁酉元兵攻天井關元光元年七月
丙辰上黨公完顏開復澤州元丁丑八月詔諭太師
國王穆呼哩曰太行之北朕自經略太行以南卿其

勉之乃建行省於雲燕以圖中原 世祖中統二年
以太行一帶東至平灤西控關陝應有險阻於附近
民內選諳武事者修立堡寨守禦至正十九年察罕
特穆爾發晉兵出太行會汴及河南定以兵分鎮關
陝荆襄河洛江淮而重兵統太行營壘旌旗相望數
千里乃日修車船繕兵甲務農積穀訓練士卒謀大
舉以復山東二十六年十月左丞相庫庫特穆爾自
彰德退軍屯澤州二十八年正月魏賽音布哈及關

保會李思齊張良弼兵夾攻庫庫特穆爾於澤州二月庫庫特穆爾退軍平陽關保軍澤州 明洪武元

年僉大都督府事陳德破澤州磨盤寨獲元叅政喻仁遂會大軍克平陽九月馮勝湯和取澤潞絳二年和同徐達拔河中渡河入潼關 崇禎五年流賊掠

大陽鎮九月賊犯州西客將吳開先禦於王壁村頗有殺傷賊遁尋追擊至留墩開先戰死民兵千二百人陣沒陽和兵掩擊於陵川遂大敗之歙人吳開先

戰澤州城西賊敗去旋再犯澤攻八日陷之遠近震動劉令譽按豫日記崇禎五年七月十六日潰賊近河內柏鄉鎮予料賊必犯紫陵紫陵拒郡城十五里為太行山通清化必繇之路即面促曹帥文詔邀擊惜兵行稍緩未扼其吭第擊其尾尚斬級二百五十二顆賊大勢奔晉而扎老營於漢高城焉十七日鄧鎮玘於清化斬級二十七顆十八日曹鄧二帥往勦漢高城賊賊遺棄婦女騾馬甚衆兵貪餌賊遂免

脫劉令譽會勦晉寇檄仙神口西北有磨子灘乃
晉地也其始藏樂伶賊五十人不時犯口而沿山天
井關等處走為熟徑今數已滿千修營於聖皇屏深
溝高壘日遣馬賊百餘混擾晉豫間流賊寇修武
清化者竄入平陽時副總兵左良玉將昌平兵往援
河南因檄入山西禦之頗有斬獲河南巡撫樊尚璟
以良玉駐澤州扼豫晉咽喉可四面為援兵從之時
曹文詔將陝西兵上令良玉受尚璟節制與文詔同

討賊有急則秦兵東豫兵西良玉兵從中橫擊六年
正月賊犯隰州陷陽城良玉敗之於涉縣之西陂二
月又敗賊於武安 六年三月賊從河內上太行臨
洮總兵曹文詔大敗之澤州賊走潞安文詔至陽城
遇賊不擊自沁水潛師還擊之斬首千餘四月賊犯
州西秋蘿李寨村副將李卑駐周村兵單不前俄總
兵曹文詔至時漏下三刻襲於潤城斬一千五百級
六月辛巳左良玉破賊於懷慶賊盡奔太行山

國朝順治元年賊劉芳亮據澤

大兵至乃潰九月賊劉忠破韋町堡六年賊陳杜張
斗光據州討平之

高平縣

周赧王三十五年秦白起伐趙取代光狼城 秦昭王
四十七年九月上將軍白起軍射殺趙括 隋大業
十年十一月己酉賊帥司馬長安破長平郡 宋建
隆元年石守信敗李筠於長平北陳西南二十里

靖康元年二月金師至高平知澤州高世田往犒之
乃去 金師圍太原守將折可求劉光世軍皆敗平
陽府義兵亦叛導金人入南北關取隆德府遂攻高
平宰相咎尚書右丞京城四望守禦使李綱盡遣城
下兵追敵上倉皇無措急徵諸將還諸將已追及金
人於邢趙間遽得還師之命無不扼腕比綱力爭復
追而將士解體矣 明崇禎五年游擊猛如虎擊邢
紅狼於高平解其圍

國朝順治元年九月餘賊劫攻高平署縣周再勲拒守

陽城縣

漢建安十年十月高幹據并州入濩澤河東太守杜畿
守濩澤幹攻城不下曹操徵馬騰擒幹斬之 晉義

熙十二年丁零翟猛雀驅掠吏民入白澗山為亂魏

遣張蒲長孫道生討之

白澗山在陽城

後魏永興五年六月

濩澤劉逸自號征東將軍三巴王建興王紹為置署

官屬攻逼建興郡元城侯元屈等討平之 西魏大

統十七年楊擲拒齊師繇侯井里下邵原 唐光化
初李嗣昭援王珂汴兵走復以步騎三萬下太行略
河內拔懷州進攻河陽 宋建炎時河東北雖陷土
豪聚衆保險河南孟汝唐州鎮撫使翟興遣蠟書結
約之向密王簡王英輩皆願受節制奏上授興河東
北路軍馬使徧檄山砦繇是汾澤潞懷衛間山砦首
領皆應命遣子崧生擒金河東都統巴古遂復陽城
縣乘勝取絳之垣曲進至米糧川 金孔彥舟討平

太行山車轅嶺賊

明正德七年霸州賊劉七等

劉六

名寵劉七名宸

至縣東東巷等村民以鐵鍋排列衢巷登屋

用瓦擊之賊不能入引去

嘉靖二十四年河南賊

六七十人擾下交都等村典史王標追襲遇害於白

桑村 四十四年西南八十里沁水難川賊牛大牛

二延三等假開墾山田劫掠敗會勦官兵用招撫計

擒之 崇禎四年王嘉印轉掠至陽城南山延綏副

總兵曹文詔追及之其下斬以降五月河曲賊王嘉

印繇沁水經縣西趨南山賊黨斬其首以降六月癸卯副總兵曹文詔擊斬賊王嘉印於陽城其黨復推王自用為首號曰紫金梁其黨自相名目有老猢猻八金剛闖王闖將八大王掃地王闖塌天破甲錐邢紅狼亂世王混天王顯道神鄉里人活地草等分為三十六營五年流賊躡山西監司王肇生知歙人吳開先勇畧便宜置為將使擊賊戰澤州城西賊敗去從沁水轉掠陽城開先恃勇渡沁戰北留墩下擊斬

數百人砲盡無援一軍盡歿賊遂陷澤七月紫金梁
老獬獬自沁水端氏犯縣東入澤州大陽去八月自
沁水竇莊犯縣東北西南入沁水翼城去十月自長
子遁入境陽和兵大勝於陽泉十一月自沁水榼山
入境總兵尤世祿失利次日勝之游擊白安大敗賊
於北鄉十二月復自沁水入境六年二月犯縣南從
邵原闕下濟源三月繇西入境總兵曹文詔大戰敗
於芹池劉村四月犯縣東曹文詔襲之於潤城大敗

之五月西入境裨將艾萬年追襲敗績九月餘寇二
即神盤踞十字河邑人石鳳臺撫其衆五百孤山副
總兵李卑敗賊於陽城之即家山又與艾萬年連敗
之南獨泉土河村復敗之茆堰村

國朝順治元年十月賊劉忠繇潞安至城下攻圍十一
日邑人堅守時潘貞善火礮發無不中賊遁四年邪
教高飛王希堯衆千人據腰盆照照龕官兵勦除之
陵川縣

唐會昌三年河陽行營招討使王宰進破劉公直拔陵川
王宰急攻陵川破賊石會闕進攻澤州昭義將
郭誼殺劉稹降 金元光元年蒙古穆呼哩攻陵川
破之 元至正四年八月郭和尼齊上太行由陵川
入壺關至廣平殺兵馬指揮十七年九月陵川縣陷
縣尹張輔死之十月曹州賊上太行山 明崇禎五
年九月賊勢盡嚮河北山西巡撫宋統殷備兵冀北
王肇生率軍次陵川扼賊北歸賊北走遇官軍賊死

鬪互相勝負會夜與賊爭險對營兩山頭賊緣窮谷而登大譟官軍亂統殷肇生皆走與諸軍相失宣大總督張宗衡將兵至高平統殷肇生以師畢會大破賊於桑子鎮賊復入沁水十一月以許鼎臣代宋統殷九月宣大總督張宗衡間移駐平陽命提陽和兵從澤州尾賊至陵川勝之再敗賊潞安之西火斬二千級連戰陽城之陽泉沁水之毛連溝鹿臺寺石塔杏谷並破之俘斬皆千人六年兵部以晉賊之急有

三西在平陽東在澤潞西北在汾太沁遼議督臣張
宗衡駐平陽任東西二賊將白安虎大威四千人以
平陽澤潞四十一州縣責之加以李卑兵一千賀人
龍兵一千左良玉兵二千五百共八千人撫臣許鼎
臣駐汾州任西北賊將張應昌苟伏威二千人以汾
太沁遼三十八州縣責之加史記事頗希收兵一千
艾萬年兵一千五百寧武兵一千岢嵐代州北接利
民馬站老營兵二千共七千人宗衡提陽和兵從澤

州潛師尾賊後至於陵川勝之再擊賊於潞州之西
火大勝之斬首二千級輝縣之北陵川之南有村
曰水峪回賊竊據數十年大為民患崇禎三年河南
副使祝萬齡監軍磁州與山西監司王肇生合兵擊
六戰焚其巢賊遂平已而流賊自山西入河北掠新
鄉萬齡邀擊之賊走陵川已復大至新鄉

沁水縣

西燕慕容永率衆向洛陽朱序自河陰北濟與永偽將

王次等相遇乃戰於沁水次敗走斬其支將勿支首
叅軍趙睦江夏相桓不才追永破之於太行永歸上
黨時楊楷聚衆數千在湖陝間永敗遣任子詣序乞
降序追永至上黨之白水與永相持二旬聞翟遼欲
向金墉乃還 宋史牛皐傳岳飛遣梁興渡河糾合
忠義社取河東北州縣興會太行忠義及兩河豪傑
趙雲李晉董榮牛顯張峪等破金人於垣曲又捷於
沁水追至孟州之邵原 營盤在東門外明初湯大

夫康都督駐師二十餘日以殲韓平章衆 崇禎四
年河曲賊王嘉印繇沁水入陽城五年七月山西巡
撫宋統殷擊賊於長子賊奔沁水庚辰賊首紫金梁
老猓猓八金剛以三萬衆圍寶莊時張道濬家居率
其族禦之賊多死聞秦師且至懼欲乞撫紫金梁呼
於壁下道濬登陴見之紫金梁免胄前曰我王自用
也向誤從王嘉印故至此此來乞降耳俄老猓猓亦
至道濬諭之曰急還所俘散若徒衆吾為請於撫軍

貸爾死賊乃還所掠拔營而西入陽城界道濬以賊情告統殷曰賊狡未可信因遣使往覘賊諸賊咸就約惟八大王閭塌天五營不受命紫金梁歸款未決諸軍乘賊不備輕騎襲賊營賊怒南犯濟源陷溫縣張道濬見賊一賊前致好詞本宜川諸生韓廷憲也乃與定約巡撫宋統殷命守備薛天祿往受之宣大總督張宗衡部兵乘不備掩襲賊怒殺天祿復叛而南下廷憲以三騎來歸偵亂世王與紫金梁爭一

村婦貽書間之賊果疑分七大部多者萬人少者數
千人圍孟縣殘忻州窺定襄躡五臺勢猶熾六年
五月賊犯沁水總兵曹文詔大敗之擒其魁大虎又
敗之遼城毛嶺七月辛丑賊陷城賊自秦入晉五犯
沁水至是陷之十年陽和兵敗賊於鹿臺石塔

蒲州府

永濟縣

漢永初五年二月先零羌寇河東遂至河內後趙石

季龍攻長安以石挺為前鋒都督石生遣將軍郭權
率鮮卑涉瑣部衆二萬為前鋒拒之生統大軍繼發
次於蒲坂前鋒及挺大戰潼關敗績挺及丞相左長
史劉隗皆戰死季龍退奔澠池枕尸三百餘里鮮卑
密通於季龍背生而擊之生時停蒲坂不知挺之死
也懼單馬奔長安郭權復相持於渭汭生遂去長安
潛於雞頭山 建安六年高幹郭援侵畧河東關右
震動鍾繇帥馬騰等擊破之 司馬彪戰畧袁尚遣

高幹郭援將兵數萬人與匈奴單于寇河東遣使與馬騰韓遂等連和騰陰許之傳幹說騰曰袁氏背王命將軍既事有道不盡其力欲以坐觀成敗吾恐成敗既定奉辭伐罪將軍為誅首矣於是騰懼幹曰智者轉禍為福今曹公與袁氏相持而高幹郭援獨制河東將軍誠能引兵討援內外擊之其勢必舉是將軍一舉斷袁氏之臂解一方之急曹公必重德將軍騰曰敬從教遣子超將精兵萬餘人并將遂等兵與

鍾繇會擊援等大破之 鍾繇既率馬騰等兵斬援
首幹及單于皆降後幹復舉并州反河東衛固弘農
張琰各起兵應之太祖以張既為議郎叅繇軍事使
西徵諸將馬騰等皆引兵會擊幹等破之斬琰固首
幹奔荊州 姚襄率衆萬餘攻秦平陽太守苻產于
匈奴堡苻柳救之為襄所敗引還蒲坂襄遂攻堡克
之殺苻產盡坑其衆遣使從苻生假道將還隴西生
將許之苻堅諫曰姚襄人傑也今還隴西必為深害

不如誘以厚利伺隙而擊之生乃止遣使拜襄官爵
襄不受斬其使者焚所送章策冠掠河東生怒命其
大將軍張平討之襄乃卑辭厚幣與平結為兄弟平
更與襄通和 前秦建元元年苻柳據蒲坂叛秦秦
王苻堅遣王猛鄧羌攻之柳出挑戰猛閉壘不應柳
以猛為憚已留其世子良守蒲坂率衆二萬將攻長
安長安去蒲坂二百餘里羌率勁騎七十夜襲敗之
柳引軍還猛又盡衆邀擊悉俘其卒柳與數百騎入

蒲坂猛尋破之斬柳猛屯蒲坂 平陽太守慕容冲
起兵河東有衆二萬進攻蒲坂秦王堅命竇衝擊敗
之冲奔於慕容泓 檀道濟沈林子攻拔襄邑堡建
威薛帛奔河東道濟自陝北渡攻蒲坂使將軍苟卓
攻匈奴堡為泓寧東姚成都所敗泓遣姚驢救蒲阪
胡翼度據潼關沈林子說道濟曰今蒲阪城堅池濬
非可卒剋攻之傷衆守之引日不如棄之先事潼關
道濟從之乃棄蒲坂向潼關姚讚進據蒲津屯於河

上遣恢武姚難運蒲阪穀以給其軍至香城為晉師
所敗時泓遣姚謏守堯柳姚和都討薛帛於河東聞
王師至難乃無道赴救未至而難敗因破裕裨將於
河曲遂屯蒲阪泓以晉師之逼遣使乞師於魏魏遣
司徒南平公元嵩等進據河內游擊將軍王洛生屯
於河東為泓聲援劉裕至潼關遣將軍朱超石徐猗
之會薛帛於河北以攻蒲阪鎮東姚璞及姚和都擊
敗猗之等於蒲阪猗之遇害

姚泓傳

赫連勃勃僭即帝

位改元為武昌遣其將叱奴侯提率步騎二萬攻晉

并州刺史毛德祖於蒲坂德祖奔於洛陽以侯提為

并州刺史鎮蒲坂

赫連勃勃傳

後魏始光三年九月遣司

空奚斤率義兵將軍封禮雍州刺史延普襲蒲坂奚

斤未至夏蒲坂守將赫連乙升棄城西走長安奚斤

遂入蒲坂齊范陽盧叔武好奇策慕諸葛亮之為

人肅宗問以世事叔武勸討關西畫地陳兵勢曰人

衆敵者當任智謀鈞者當任勢力故强者所以制弱

富者所以兼貧今大齊之比關西強弱不同貧富有異而我馬不息未能吞併此失於不用強富也輕兵野戰勝負難必非深謀遠算萬全之術也宜立重鎮於平陽與彼蒲州相對深溝高壘運糧積甲築城戍以屬之彼若閉關不出則取其黃河以東長安窮蹙自然困死如彼出兵非十萬以上不為我敵所供糧食皆出關內我兵士相代年別一番穀食豐饒運送不絕彼來求戰我不應之彼若退軍即乘其弊自長

安以西民疏城遠敵兵來往實有艱難與我相持農
作且廢不過五年彼自破矣帝深納之又願自居平
陽成此謀畧上令元文遙與叔武叅謀撰平西策一
卷未幾肅宗崩事遂寢 永熙三年七月周太祖以
大都督趙貴為別道行臺自蒲坂濟趣并州 東魏
天平元年八月齊神武至弘農遂西剋潼關執毛洪
賓進軍長城龍門都督薛崇禮降神武退舍河東命
行臺尚書長史薛瑜守潼關大都督庫狄溫守封陵

於蒲津西岸築城守華州以薛紹宗為刺史高昂行
豫州事 三年十二月丁丑齊獻武王自晉陽西討
次於蒲津 四年正月竇泰失利十月壬辰齊獻武
王西討至沙苑不克而還 西魏大統元年東魏遣
其將司馬子如寇潼關周太祖軍灞上子如乃回軍
自蒲津寇華州刺史王羆擊走之 三年十月沙苑
勝賀拔勝李弼渡河圍蒲坂牙門將高子信開門納
勝軍東魏將薛崇禮棄城走勝等追獲之太祖進軍

蒲坂畧定汾絳 沙苑不利東雍諸城復為西軍所
據遣汾州刺史斛律金與尉景庫狄等計復之 周
建德五年東伐上開府劉雄從齊王憲拔洪洞下永
安軍還仍與憲廻援晉州未至齊後主已率大兵親
自攻圍晉州垂陷憲遣雄先往察其軍勢雄乃率步
騎千人鳴鼓角先報城中尋而高祖兵至齊主遁走
隋仁壽末漢王諒遣茹茹天保來據蒲州燒斷河
橋又遣王暕子率數萬人并力拒守左僕射楊素將

輕騎五千襲之潛於渭口宵濟遲明擊之天保敗走
聃子懼而以城降有詔徵還初素將行計日破賊皆
如所量聞喜裴文安為漢王諒總管府兵曹諒反
文安說諒曰井陘以西是王掌握之內山東士馬亦
為我有宜悉發之分遣羸兵守要路仍令隨方畧地
率其精銳直入蒲津文安請為前鋒王以大軍繼後
風行電掣頓於灞上咸陽以東可指揮而定關中兵
不暇集羣情離駭我即陳兵號令誰敢不從旬日之

間事可定矣諒大悅署文安為柱國如其計部署諸將未至蒲津諒忽改圖召文安文安至曰兵機貴速本欲出其不意王既不行文安又退使彼計成大事去矣未幾煬帝使楊素將兵擊諒諒降於素帝親率諸軍圍河東郡分遣大郎二郎長使裴寂勒兵各守一面帝登城東原上西望城內所為屈突果不敢出兵閉門自守城高甚峻不易可攻帝觀義士等志試遣登之南面千餘人應時而上時值雨甚帝命旋

師軍人既得上城遂不時速下帝曰屈突宿衛舊人解安陣隊野戰非其所長嬰城善為捍禦我師常勝人必輕之驍銳先登恐無還路今且示威而已未是攻城之時殺人得城如何可用乃還命諸將移營河渚唐武德元年十一月癸丑行軍總管趙慈景攻蒲州隋刺史堯君素拒戰執慈景堯君素守河東唐遣獨孤懷恩攻之不下招之不從久之食盡又聞江都傾覆左右殺君素以降別將王行本誅作亂者復

乘城拒守懷恩引兵圍之武德二年行本與劉武周合關中震動尉遲敬德與別帥尋相又援行本於蒲秦王破卻其軍蒲州降至德二年三月郭子儀大破賊於潼關崔乾祐退保蒲津時永樂尉趙復河東司戶韓旻司士徐景宗子李藏鋒等陷賊在蒲州四人密謀俟王師至則為內應及子儀攻蒲州趙復等斬賊守陴者開門納子儀乾祐與麾下數千人北走安邑唐代宗時吐蕃入寇河中節度使郭子儀悲

兵乘邊召王翊為河中少尹領節度後務悍將凌正
數千法不逞約其徒夜斬關逐翊翊覺之陰亂漏刻
以差其期衆驚不敢發俄擒正誅之一軍惕息興
元元年詔馬燧為河東保寧奉誠軍行營副元帥與
渾瑊駱元光合兵討李懷光時賊黨要廷珍守晉毛
朝敬守隰鄭抗守慈燧移檄鐫諭皆以州降乃率步
騎三萬次於絳畧定諸縣降其將馮萬興任象玉遂
圍絳拔外郭守將夜棄城去降四千人遣李自良定

六縣降其將辛統收卒五千與賊戰寶鼎射殺賊將
徐伯文斬首萬級獲馬五百時多請宥懷光者捨軍
入朝言得三十日糧足平河中乃與瑊元光韓游瓌
之兵合賊將徐廷光守長春宮城燧度長春不下則
懷光固守久攻所傷必衆乃挺身至城下見廷光廷
光憚燧威拜城上燧顧其心已屈徐曰我自朝廷來
可西嚮受命廷光再拜燧曰公等朔方士自祿山以
來功高天下奈何棄之為族滅計若從吾言非止免

禍富貴可遂也未對燧曰爾以吾為欺耶今不遠數步可射我披而示之心廷光感泣一軍皆流涕即率衆降燧以數騎入其城衆大呼曰吾等更為王人矣渾瑊亦自以為不及也歎曰嘗疑馬公能窘田悅今觀其制敵固有過人者吾不逮遠矣進營焦籬堡堡將降餘戍望風遁去燧濟河兵八萬陣城下是日賊將牛名俊斬懷光降衆猶萬六千誅其黨閭宴孟寶張清吳罔等他脅附悉赦之不閱月河中平馬燧

為河東節度使為戰車冒以狻猊象列戰於後行以載兵止則為陣遇險則制衝冒討田悅推火車焚其將楊朝光柵進擊大破之唐德宗時韓游瓌攻李懷光兵於乾坑遂會馬燧圍蒲城師次焦籬堡守將尉珪降黃巢分兵畧蒲州節度使李都不能支乃降副使王重榮脇說都都奔行在乃悉驅出賊使斬之賊使健將朱溫以舟師下馮翊黃巢率衆自華陰谷攻重榮重榮感勵士衆大戰敗之賊棄糧仗四十

餘艘後復出兵夏陽掠河中漕米數十艘重榮選兵
三萬攻溫溫懼悉鑿舟沈於河遂舉同州降天復
元年張存敬攻下河中節度使王珂為朱全忠所執
後漢乾祐元年三月護國軍節度李守貞以杜重
威死懼不自安而趙思綰先以京兆反遣人以赭黃
衣遺之守貞大喜發兵據潼關招誘草寇所在竊發
夏四月辛巳陝州兵馬都監王玉克潼關戊子保義
軍節度使白文珂為河中兵馬都部署常思副之而

王景崇又以鳳翔反景崇思綰遣人推守貞為秦王
文珂及王峻郭從義等攻景崇思綰久無功八月壬
午遣樞密使郭威率禁兵將文珂等督攻之諸將皆
請先擊思綰景崇威計未知所向行至華州節度使
扈彥珂謂威曰三叛連衡以守貞為主守貞先敗則
思綰景崇可傳聲而破矣若捨近圖遠使守貞出兵
於後思綰景崇拒戰於前則漢兵屈矣威以為然遂
先擊守貞是時馮道罷相居河陽威初出兵過道家

問策道曰君知博乎威少無賴好蒔博以為道譏之
艷然而怒道曰凡博者錢多則多勝錢少則多敗非
其不善博所以敗者勢也今合諸將之兵以攻一城
較其多少勝敗可知威意大悟謀以遲久困之乃與
諸將分為三柵威柵城東常思柵城北紀作南白文珂
柵城西而闕其南發五縣丁夫築長城以連三柵守
貞出兵壞長城威輒補其所壞守貞輒出爭之守貞
兵常失十三四如此逾年守貞城中兵無幾而食又

盡二年七月趙思綰降丁巳威使郭從義殺之乃謂將士曰可攻矣為期日督兵四面攻甲子破河中羅城守貞與妻子自焚磔其餘黨馬全義幽州薊人十餘歲學擊劍善騎射漢乾祐中李守貞鎮河中召置帳下及叛周祖討之全義每率敢死士夜攻周祖壘多所殺傷守貞貪而無謀性多忌刻全義屢為畫策皆不能用城陷遂變姓名亡命周廣順初張思鈞從聶知遇攻河東破其衆三千餘周祖討李守

貞以吳虔裕為河中行營都監率護聖諸軍五千以
往李守貞出兵五千設梯橋分五路於長連城西北
以禦周祖周祖令虔裕率大軍橫擊之蒲人敗走奪
其梯橋殺傷大半 李韜河朔人周祖征三叛韜從
白文珂攻河中兵傳其城文珂夜詣周祖議犒軍留
韜城下時營柵未備李守貞乘虛來襲營中忽見火
發知賊驟至惶怖失據客省使閻晉卿率左右數十
人遇韜於月城側謂韜曰事急矣城中人悉被黃紙

甲為火所照色俱白此殊易辦奈軍士無鬪志何韜
憤怒曰豈有食君祿而不為國致死耶即援稍而進
軍中死士十餘輩隨韜犯賊鋒蒲有猛將躍馬持戈
擬韜韜刺之洞胷而墜又連殺數十人蒲軍遂潰因
擊大破之守貞自是閉壘不敢出俄驍將王三鐵降
城遂平韜由此知名後為趙州刺史移慈州宋初卒
宋治平二年發指揮二十分戍永興軍邠州河中
府仍遣官專掌訓練靖康間金人犯河東令棄官

去孟縣主簿祝公明攝縣事率保甲入援圍守踰年
城陷不屈 金天會五年羅索以重兵壓河中宋權
府事却仲連力戰外援不至城陷死之 天眷三年
五月右監軍薩里哈出河中趨陝西六月陝西平
大定五年七月戊申朔徙陝西元帥府於河中 貞
祐初議遷都朝臣謂可遷河中河中背負關陝五路
士馬全盛南阻大河可建行臺以為左翼前有絳陽
平陽太原三大鎮敵兵不敢輕入應三鎮郡縣之民

皆聚之山寨敵至則為晝攻夜劫之計屯重軍中條則行在有萬全之固矣主議者以河中在河朔又無宮室不及汴議遂寢遷後二三年詔元帥都監內族阿魯岱行帥府事阿魯岱懼怯不能軍竭民力浚築未幾絳州破阿魯岱馳奏河中孤城不可守有旨果不可守則棄之無至資敵阿魯岱遂棄河中燒民戶官府一二日而盡尋有言河中重鎮國家基本所在棄之為失策設為敵人所據則大河之險我不得專

恃矣宣宗悔悟繫阿魯岱同州獄累命完復之隨守
隨破至正大八年以內族草火阿格板子阿格將兵
二萬同守之九月元兵期以九年合南北兵攻汴故
自將攻河中哈達豐阿拉遣王敢率步兵一萬救之十
二月河中破初河中主將知元兵將至懼軍力不足
截故城之半守之及被攻行帳命築松樓高二百尺
下瞰城中土山地穴百道並進至十一月攻愈急王
敢救軍至軍士死鬪日夜不休西北樓櫓俱盡白戰

又半月力盡乃陷草火阿格戰數十合始被擒尋殺之
板子阿格提敗卒三十奪船走北兵追及鼓譟北岸上
矢石如雨數里有戰船橫截之敗軍不得過船中
有賣火砲名震天雷者連發之砲火明見北船軍無
幾人力斫橫船開得至潼關遂入關鄉赦將佐以下
決板子阿格杖二百識者謂河中城守不下德順力竭
而陷非戰之罪人多寃之四年十月商州經畧權元
帥右都監郭仲元上書曰陝西一路最為重地潼關

禁坑及商州諸隘俱當豫備向者中都軍都最為要害乃繇小嶺紫荆遠出我軍腹背受敵卒不能守近日由禁坑出遂失潼關可遣精兵分地戍之其後乃置秦藍守禦興定二年十二月己亥朔以御史中丞完顏伯嘉權叅知政事元帥左監軍行河中府尚書省元帥府控制河東南北路便宜從事乙卯嵐州元帥爪爾佳完復河東三年九月庚戌命行省胥鼎領兵赴河中五年十月戊寅分京畿戍卒萬二千河中

民兵八千以許州元帥赫舍哩鶴壽將之屯潼關十
二月辛亥朔元兵下潼關元光元年十月壬子河中
府萬戶孫仲威執其安撫使阿布哈和囉羅據城叛
陝西行省遣將討平之十二月乙亥朔以河中治中
侯小叔權元帥府右都監便宜行事二年河東南路
安撫副使侯小叔出城與都監訛論議兵事石天應
乘機取河中府作浮橋通陝西小叔駐樂李山寨衆
兵畢會夜半坎城以登焚樓櫓火照城中天應大驚

盡棄輜重牌印馬牛雜畜死於雙市門小叔燒絕浮
橋撫定其衆時中條山賊侯七等聚衆十餘萬伺
大兵既西謀襲河中石天應遣別將吳權府引兵五
百夜出東門伏兩谷間戒之曰侯賊過半急擊之我
出其前爾攻其後可克也吳權府醉酒失期天應戰
死城陷賊燒毀廬舍殺掠人民走中條先鋒元帥按
扎爾邀擊敗之斬數萬級侯七復遁去穆呼哩以天
應子額爾克襲領其衆金元帥侯小叔襲破河中麻

阿魯低棄河中燒民宮室尋有言河中重鎮國家基
本所在設為敵人所虜則大河之險我不得而專恃
矣金主命有司復修葺之終不能成隨守隨陷二年
正月乙巳元兵下河中府侯小叔復之丁卯元兵復
下河中府二年正月元軍十萬圍城援兵不敢動城
破同知河中府事侯小叔死之後四十餘日中條諸
寨無所統領乃詔推官嘉勒幹總其軍三月癸丑以
河中府推官嘉勒幹權元帥右都監總領侯小叔軍

甲子以完顏伯嘉權叅知政事行尚書省於河中府
五月丙午京兆行省完顏哈達復河中府及榮州六
月甲午詔罷河中行省置元帥府正大元年正月丁
巳詔朝臣議修復河中府禮部尚書趙秉文太常卿
楊雲翼等言陝西民方疲敝未堪力役遂止七年十
月副樞伊喇豐阿拉權叅知政事同平章哈達行省事
於闐鄉以備潼關八年正月遣樞密院官白華右司
郎中瓜爾佳巴哩瑪諭闐鄉行省進兵哈達豐阿拉以未

見機會不行復遣白華諭出關以解鳳翔之圍又不
行四月鳳翔陷兩行省棄京兆遷居民於河南留慶
善努守之七月元兵駐河中府慶善努棄京兆東遷
召哈達豐阿拉赴汴議兵趨河中府懼不敢行還陝州
出師至冷水谷而歸元兵攻河中府哈達豐阿拉遣元
帥王敢率兵萬人救之十一月丁未元進兵嶢峰關
繇金州樞密院議以逸待勞未可與戰而卒詔諸將
屯軍襄鄧十二月己未河中府破權僉樞密院事草

火阿格死之元帥板子阿格提敗卒三千走閭鄉詔赦將佐以下杖阿格二百以死哈達豐阿拉率諸軍入鄧州河中自石天應死復為金有辛卯帝親攻拔之金元帥完顏和囉走塔斯追斬之塔齊爾從圍河中府九月陝西行省防秋時元兵在河中托壘已領兵入界慶善努報糧盡將棄京兆而東樞密院判官白華奏偵候得托壘所領軍馬四萬行營軍一萬今就漢禦之諸軍比到可行半月不若徑往河中目今

沿河屯守一日可渡如此中得利襄漢軍馬必當遲
疑不進在北為投機在南為掣肘臣以為如此便哈
達自陝州進奏帖亦為此事上問豐阿拉河中可擣否
對曰托壘兵雖多計皆冗雜河中軍少而精無非選
鋒我軍北渡元兵必遣輜重屯於平陽之北匿其選
鋒百里之外放我師渡然後斷我歸路與我決戰恐
不得利哈達入見亦言河中之事與前日上奏時勢
不同不敢自主議遂寢二相還陝量以軍馬出冷水

谷而已 天興元年乙酉以點檢爪爾佳薩哈為總帥
將步騎三萬巡河渡權近侍局使圖克坦長樂監其軍
丙戌元兵既定河中繇河清縣白坡渡河丁亥長樂
薩哈引兵至封邱而還戊子都尉烏林阿呼圖一軍
自潼關入援辛丑潼關守將李平以關降元 元致
和元年九月河東聞額森特穆爾軍至官吏皆棄城
走悉以其黨代之 明宗初陝西行省丞相阿斯罕
舉兵至河中達魯噶齊多爾濟趨晉寧告亂知河中

府劉天孚日夜治戰守具選丁壯分守要害令河東
縣達噶齊托音圖守大慶關津口盡收船舫東岸
令判官蘇伯特穆爾守汾陰推官程謙守禹門河東
縣尹王文義守風陵等渡阿斯罕軍列柵河西岸使
來索舟天孚八遣人至晉寧乞援兵不報居七月阿
斯罕縛筏河上欲縱火屠城同知府事特格河東廉
訪副使明安詣阿斯罕軍阿斯罕囚之而斂船濟兵
入城天孚斫冰開投河中至正七年十一月命關

保分省於晉寧是歲詔分潼關以西屬李思齊潼關
以東屬庫庫特穆爾於是關保退屯潞州二十六年
七月丙申庫庫特穆爾遣朱珍盧旺屯兵河中遣關
保和哩齊會兵渡河攻張良弼良弼與李思齊等拒
守關保不利 明洪武元年二月都督康茂才率兵
取河中府元平章呂德楊晟棄城西遁二年正月大
將軍徐達克河中府遂會諸將進取陝西造浮橋渡
河 崇禎三年賊王嘉印逼州屬分守道焦源溥簡

鄉勇五百人前後十餘戰斬渠魁五閭王九條龍賊不敢窺遁河南五月流賊破蒲州潞安官兵敗沒四年正月癸未流賊自蒲州犯平陽九月壬辰總督陝西三邊洪承疇擊擒點燈子趙四兒四兒起青澗綏德奔突延西間往來奏晉沿河郡縣多苦之至是伏誅平陽稍安其黨黑煞神起又有過天星蝎子塊與紫金梁等共數十部五年正月延綏賊陷宜君保安合水流入山西者陷永寧蒲州大掠四出山西巡按

御史羅世錦歸咎於秦謂以鄰為壑八年二月詔山西撫臣移蒲州進援靈陝先是七年九月以吳姓巡撫山西秦賊在晉者姓會兵逐之走河南惟顯道神活地草鄉里人三營留晉姓方謀合兵勦滅會西人入塞六月斂兵防河賊復熾十六年十二月二十五日賊自榮河襲陷蒲州甲申正月十六日闖賊李自成至蒲州

國朝順治元年六月賊西遁十月初一日偽防禦使吳

養德偽州牧劉修道棄城遁 六月賊虞印封汝宦
陷城知州錢法裕游擊武韜守備許世德死之八月
初一日陝西總督孟喬芳復州城餘衆敗潰

臨晉縣

漢王三年以韓信為左丞相擊魏信問酈生魏得毋用
周叔為大將乎曰栢直也信曰豎子耳遂進兵擊魏
魏盛兵蒲坂塞臨晉信乃益為疑兵陳船欲渡臨晉
而伏兵從夏陽以木罌缶渡軍襲安邑豹驚引兵迎

信信遂虜豹定河東使人請漢王願益兵三萬人請
北舉燕趙東擊齊南絕楚之糧道西會於滎陽漢與
兵三萬人遣張耳與俱進擊趙代破代擒夏說閼與
信下魏代漢輒使人收其精兵詣滎陽以拒楚信耳
以兵數萬欲東下井陘擊趙趙王成安君陳餘聞漢
且襲之聚兵井陘口號稱二十萬廣武君李左車說
成安君絕其輜重勿與戰成安君不聽信間人窺知
其不用還報大喜引兵遂下未至井陘口三十里止

舍夜半傳發選輕騎二千人持一赤幟從間道葺山而望趙軍誠曰趙見我走必空壁逐我若疾入拔趙幟立漢幟令其裨將傳餐曰今日破趙會食諸將皆陽應曰諾信謂軍吏曰趙已先據便地彼未見大將旗鼓未肯擊前行恐吾阻險而還乃使萬人先行出背水陳趙兵望見大笑平旦信建大將軍旗鼓鼓行出井陘口趙開壁擊之大戰良久於是信棄鼓旗走水上軍復疾戰趙空壁爭漢鼓旗逐信已入水上

軍軍皆死戰不可敗而所出奇兵二千騎者候趙空
壁逐利即馳入趙壁皆拔趙旗幟立漢赤幟二千趙
軍已不能得信然還歸壁皆漢赤幟大驚以漢為
已破趙王將矣遂亂遁走趙將雖斬之弗能禁於是
漢兵夾擊破虜趙軍斬成安君泚水上擒趙王歇信
乃令軍毋斬廣武君有生得之者購千金頃之有縛
至戲下者信解其縛東鄉坐西鄉對而師事之諸將
効首虜休皆賀因問信曰兵法右背山陵前左水澤

今者將軍令臣等反背水陳曰破趙會食臣等不服然竟以勝何也信曰此在兵法顧諸君弗察耳兵法不曰陷之死地而後生置之亡地而後存乎且信非得素拊循士大夫所謂毆市人而戰之也其勢非置死地人人自為戰今即予生地皆走寧尚得而用之乎諸將皆服曰非所及也西燕慕容顗率鮮卑男女三十餘萬口去長安而東慕容恒弟韜誘顗殺之於臨晉慕容永與刁雲率衆攻韜韜遣司馬宿勤黎

逆戰永執而戮之韜懼出奔恒營恒立慕容冲子望
衆悉去望奔永永執望殺之立慕容泓子忠 晉太
尉劉裕總軍伐姚泓泓遣并州牧姚懿為之聲援懿
司馬孫暢勸懿入長安誅姚紹廢泓自立懿納之乃
引兵至陝僭號傳檄州郡卑辭招誘姚成都送佩刀
為誓成都送以呈泓又遣王國率甲士數百攻成都
成都擒國囚之宣告諸城勉以忠義秣馬厲兵徵發
義租河東之兵無一詣懿懿深患之臨晉數千戶叛

應懿姚紹濟蒲津擊臨晉叛戶大破之懿等震懼鎮
人安定郭純等率衆圍懿紹入於蒲阪執懿 明崇
禎十六年十二月流賊白鳴鶴李友自滎河竊渡二
十五日襲陷蒲州甲申正月朔運城防兵焚南門而
入十八日闖賊至縣二月流賊陷臨晉十月偽令柳
化楠逃

國朝順治六年四月賊虞印張五陷城八月陝督孟喬
芳渡河賊遁有屯軍衛某營縣東十里之令狐村喬

芳以鐵騎蹂之八百人胥殲焉

虞鄉縣

漢高祖三年假左丞相曹參別與韓信東攻魏將軍遜
邀軍東張大破之因取安邑 齊神武趨沙苑蒲坂
敬珍與從祖兄祥及同郡豪右張小白樊招賢王元
畧等舉兵數日之中衆至萬餘將襲齊神武後軍兵
未進而神武已敗珍與小白等率猗氏南解北解安
邑溫泉虞鄉等六縣戶十餘萬歸附周太祖太祖拜

珍平陽太守領永寧防主祥龍驤將軍行臺郎中領
相里防主並賜鼓吹以寵異之太祖仍執珍手曰國
家有河東地卿兄弟力也還以此地付卿我無東顧
之憂矣 隋大業末王君廓與韋寶鄧豹等掠虞鄉
宋老生與戰君廓不利保方山老生列營迫之君廓
糧盡詐請降與老生隔澗語祈請哀到老生為感動
稍緩之君廓一夕遁去 唐武德初虞州刺史韋義
節擊堯君素於蒲州不克遣獨孤懷恩代將性貪寡

箕畧數戰無功詔切責時虞鄉南山多宿盜而宋金
剛略澮州秦王屯栢壁懷思與麾下元君寶解令榮
靖謀引王行本軍與武周連和割河東以啗之會君
素卒行本得其兵部畫已定而命擊夏縣呂崇茂與
諸將皆沒於賊朱全忠攻王珂次虞鄉珂欲面縛
牽羊以見全忠止之珂出迎握手泣下駢臂以入旬
日以張存敬守河中舉珂室徙於汴

猗氏縣

唐史思明陷洛陽賊帥畧解蒲諸縣猗氏令李模率衆討平之 晉將李嗣昭助王珂敗王珙於猗氏獲其將三人 宋靖康初郭忠孝走關陝得勝兵三萬分隸十將擇一將統之繼遣兵趨澤潞聽宣撫司節制金人再入永興帥范致虛由洧澠入援忠孝曰金人深入而河東無守備願分兵走太行扼其歸路彼必來戰城下之圍可解致虛檄河中守席益馮翊守唐重與忠孝同出河東為牽制之舉大軍盡出函谷忠

孝獨以蒲解軍三千至猗氏遇金人破之踰絳州破
太平砦斬首數百級攻平陽入其郭會大軍失利清
澠間乃引還 明洪武元年右副將軍馮勝擒元右
丞賈成於猗氏崇禎十六年十二月闖賊將自禹門
渡河甲申正月賊入縣冬偽令許廣大逃

國朝順治六年賊虞印倡亂破城總督孟喬芳擊破之
賊走運城秋圍運城平之

萬泉縣

明萬曆三十九年回回百餘騎突至知縣呼延楫督快壯勦捕賊遁 崇禎四年十一月流賊經縣大掠癸丑寧武總兵孫顯祖敗蝎子塊於萬泉

榮河縣

周顯王四十年秦伐魏取汾陰 後魏秦州刺史周觀撫御失和民薛永宗聚衆於汾曲以叛觀討永宗為流矢所中卒 西魏大統三年七月齊神武率衆十萬出壺口趨蒲坂將自后土濟又遣其將高敖曹以

三萬人出河南神武遂渡河逼華州刺史王羆嚴守
知不可攻乃涉洛軍於許原西周太祖造浮橋於渭
渡渭北十月至沙苑李弼曰彼衆我寡不可平地置
陣此東十里有渭曲可先據以待之遂進軍至渭曲
背水東西為陣將士皆偃戈於葭蘆中間鼓聲而起
大破神武軍神武夜遁追至河上復大克獲 唐溫
大雅起居注丙申至汾陰遺書招馮翊賊帥孫華華
所部強兵至餘數千積年劫掠非常富實灤水以北

莫敢當之帝書到華喜而從命己亥進營停於壺口
分遣諸軍問津水濱之人具舟爭進日有數百仍署
水軍焉 馬燧與李懷光將徐伯文戰於寶鼎射殺

之斬萬餘級 梁軍救王珙晉將李嗣昭敗之於胡

壁堡獲其將一人 金元光元年十月乙未元兵下

榮州之胡壁堡及臨晉 元壬午冬十月穆呼哩兵

過晉至絳拔榮州胡瓶堡

即胡壁堡也

所至望風歸附乃

令石天應守河東 明崇禎十六年十二月賊將白

鳴鶴李友自榮河縣竊渡

山西通志卷五十三

欽定四庫全書

山西通志卷五十四

武事

五

遼州

唐光啟三年昭義節度使孟方立督部將奚忠信兵三萬攻遼州以金啖赫連鐸與連和會契丹攻鐸師失期忠信三分其兵鼓而行河東節度使李克用伏兵於險忠信前軍沒既戰大敗執忠信餘衆脫歸者纔

十二人文德元年昭義節度使孟方立乞兵於王鎔以攻晉鎔許之方立乃遣其將奚忠信攻晉遼州而鎔以他故不能出兵既失約忠信大敗晉兵遂乘勝攻邢州光化二年汴氏叔琮襲破遼州天復元年四月遼州守將張鄂降汴周世宗初并人侵潞命澶州節度使郭崇與符彥卿出固鎮以禦之北漢天會三年六月周昭義節度使李筠陷遼州獲刺史張丕宋建隆二年北漢天會五年也冬昭義節度

使李繼勲敗并軍千餘人斬首百餘級獲其遼州刺史傅延彥及弟延勲來獻北漢天會八年宋遣曹

彬李繼勲及兵馬鈐轄康延沼馬步軍都軍頭尹訓

攻遼石二州北漢遣郝貴超往援戰於遼州城下北

漢兵大敗遼州刺史杜延韜與拱衛都指揮使黃進

兵馬都監侯美籍部兵三千人舉城降宋宋命降卒

以效順懷恩為名至九年十二月復取宋遼州

宋史遼州

降在乾德二年較十國紀年後一歲

金攻太原取平定樂平復招降遼

州及榆杜遼山和順諸縣 元太祖乙酉歲實納台
自正定整兵前進下太原略太行拔長勝寨斬武仙
守將盧治中圍仙於雙門寨仙遁去至正十八年五
月關先生破頭潘等陷遼州和哩齊擊走之關先生
等遂陷冀寧路二十一年察罕特穆爾謀知山東羣
賊自相攻擊乃自陝抵洛大會諸將發并州軍出井
陘遼沁軍出邯鄲澤潞軍出磁州 明正德六年七
月流賊陷城嘉靖四十一年饑賊牛大等蜂起知州

朱被劫一日釋之崇禎五年流賊一隻虎李過陷城

武鄉志四年十月二十九日紫金梁陷遼州六年春總兵尤世祿

與援勦山西守備賀人龍復遼州

國朝順治六年賊侯和尚等七攻城巡道畢拱辰嘗置
火具州民堅守數月不下

和順縣

元太祖八年秋分兵三道命皇子珠徹察哈台諤格台
為右軍循太行而南掠澤潞遼沁平陽太原古隰拔

汾石嵐忻代武等州而還至正十八年五月庚子賊兵踰太行察罕特穆爾部將闊保擊敗之明崇禎六年六月流賊陷城九年三月丙午復陷城

榆社縣

唐昭義將李丕降請取榆社東經武安入討劉稹雖邢洺未下而兵不得救潞不聽討劉稹詔河東節度使劉沔南屯榆社沔素與張仲武不協時方追幽州兵徙沔義成河東行營兵馬使王逢奏乞益榆社兵

詔河東以兵二千赴之李石召橫水戍卒千五百人
使楊弁將之詣逢四年正月楊弁作亂石奔汾州會
昌四年正月辛卯詔王逢悉留太原兵守榆社以易
定千騎宣武充海兵二千討楊弁又詔王元逵以步
騎五千自土門入應接逢軍河東兵戍榆社者聞
朝廷令易定汴兗兵取太原恐妻孥為所屠滅乃擁
監軍呂義忠自取太原擒楊弁盡誅亂卒元關虎
勲德碑夏五月盜拔遼州據榆社副河東宣閭關保

招討萬戶和哩齊二公抵城破殺乘勝大震寇夜遁
追戮幾盡遂謂太行多阨若分兵阻遏盜必不入功
收萬金列守諸口咸獲其利 明崇禎六年二月都督
同知曹文詔敗賊於榆社時文詔屢捷張應昌逗遛
不進紫金梁老獍從榆次敗北奔

沁州

漢將軍周勃轉攻韓王信軍銅鞮破之 晉王李克用
遣昭義軍留後李克恭選精兵五百送晉陽遣侯霸

部送至銅鞮霸與牙將康居受刼衆反克恭自焚霸
叛附朱全忠 昭義軍節度使李克恭選後院勁兵
五百人獻於晉王李克用行至銅鞮其將馮霸以其
徒叛晉王遣李元審討之戰於沁水元審大敗被傷
奔入潞州 宋建隆元年北漢天會四年也李筠以
上黨拒命囚監軍周光遜等送於劉鈞稱臣求援鈞
自至太平驛與筠會遣其宣徽使盧贊將騎數千隨
筠入寇又遣其河陽節度范守圖援之及太祖親討

前軍石守信高懷德破筠衆於澤州獲守圖殺鈞兵數千鈞之沙谷砦又為折德宸所破斬五百級九月昭義李繼勳率師入平遙虜獲甚衆二年冬繼勳又敗鈞兵斬百餘級獲其遼州刺史傅延彥弟延勳三年二月鈞侵晉潞二州守將擊走之三月詔河東降人徙家於邢洺計口給粟四月太原民四百七十人降七月鈞捉生指揮使路貴等十一人降四年八月邢州王全贇率師攻樂平鈞拱衛指揮使王超散指揮

使元威侯霸榮率所部千八百人降未幾鈞侍衛都指揮使蔚進馬軍都指揮使郝貴超與遼悉兵來救樂平三戰皆敗之遂下其城詔建為平晉軍以降兵為效順軍靜陽十八砦遂相率來降九月鈞復引遼攻平晉軍遣洺州防禦使郭進濮州防禦使張彥進客省使曹彬趙州刺史陳萬通將步騎萬餘救之未至而鈞遁去乾德二年二月李繼勳與兵馬鈴轄康延沼馬步軍都軍頭尹訓率兵攻遼州鈞遣郝貴超

來援戰於城下大敗刺史杜延韜危蹙與拱衛都指揮使冀進兵馬都監侯美籍部兵三千降賜延韜等襲衣銀帶器幣鞍勒馬其降兵以效順懷恩為名是月府州擒鈞衛州刺史楊璘又鈞耀州團練使周審玉等四人降四月遣馬軍都校劉光將兵戍潞五年三月鈞招收指揮使閻章以石盆砦降鎮州四月招收指揮使樊暉殺監軍成昭以鴻唐砦降鎮州六年正月偏城砦招收指揮使任恩等百五十人降晉州

三月鎮州守將攻破釣馬鞍山砦七月釣烏玉砦主
胡遇等百三十九人降鎮州 乾德六年北漢廣運
元年也八月詔伐劉繼元以內客省使盧懷忠等二
十一人將禁兵赴潞州昭義節度李繼勳為行營前
軍都部署侍衛步軍都指揮使黨進副之宣徽南院
使曹彬為都監棣州防禦使何繼筠為前鋒部署懷
州防禦使康延沼為都監建雄軍節度趙贊為汾州
路部署絳州防禦使司超副之隰州刺史李謙溥為

都監九月繼勲敗繼元軍於洞渦河其左勝軍使李
瓊來降開寶二年春詔李繼勲趙贊郭進司超等將
兵先赴太原太祖遂親征以繼元太谷令梁文陟為
太子洗馬祁令張續為右贊善大夫太祖將至繼勲
敗繼元兵於城下其憲州推官史昭文以州來降升
本州刺史乃壅汾水灌其城又遣海州刺史孫方進
圍汾州繼元方恃遼援守陴者揚言旦夕遼師至四
月何繼筠敗遼人於陽曲北命以所獲首級鎧甲示

城下城中由是喪氣知嵐州趙文度遂來降閏五月
南城為汾水陷水注城中太祖幸長隄觀焉登望樓
者見繼元殺其相郭無為城中紛擾俄而城兵自西
長連城出將焚攻戰具反為攻兵擊走之斬萬餘級
夜半傳呼壁外繼元降太祖令衛士擐甲將開壁門
八作使趙璲曰受降如受敵詎可中夜輕出太祖使
伺之果諜者也太祖納李光贊言命宰相趙普撫諭
諸將欲班師禁軍校趙翰等叩頭願乘城急擊太祖

曰汝曹我所訓練無不一當百以備肘腋同休戚也
我寧不取太原豈忍驅汝曹冒鋒鏑而蹈必死之地
乎士皆感泣遂班師九年八月又遣黨進潘美楊光
美牛思進米文義討之時繼元謀者趙訓為晉州所
捕械送於朝命釋之給服裝放歸又遣郭進入忻代
路郝崇信王政忠入汾州路閻彥進齊超入沁州路
孫晏宣安守忠入遼州路齊延琛穆彥璋入石州路
九月党進敗繼元兵數千獲馬千餘郭進得山北民

三萬七千餘十月遼州監押馬繼恩入并州境燔四十餘砦獲牛羊數千郭進又破壽陽得民九千穆彥章入并州境得民二千党進又敗繼元兵千餘於城下是月太宗即位召諸將還太平興國二年北漢廣運十年也繼元胡桃砦指揮使史溫等以其民內附太宗遂遣宣徽南院使潘美等率諸將分兵圍汾沁嵐諸州車駕遂親征以驍將郭進扼石嶺關斷遼援路遼師果至進擊敗之初繼元遣子續質於遼遼

師為進所敗繼元又遣健步問道齎蠟丸帛書求救進又得之徇於城下繼元外援不至饒道又絕潘美等兵數十萬長圍四合自春徂夏矢石如雨晝夜不息城中大懼會太宗至親督衛士急攻城無完堞手詔諭繼元降守陴者不納繼元不能知太宗躬擐甲行夜至長連城督諸將攻之控弦士數萬蹲甲交射矢集城上如蝟毛每給矢必數百萬頃之咸盡捕得城中人云繼元以十錢構一矢凡聚百餘萬太宗笑

曰此為我畜也五月庚辰繼元宣徽使范超來降攻城者以超為出戰擒而戮之繼元斬超妻子投其首城外壬午馬軍都指揮使郭萬超踰城降繼元帳下親信因之漸亡去城中危急太宗又自草詔諭之曰越王吳主獻地歸朝或授以大藩或列於上將臣僚子弟皆享官封繼元但速降必保終始富貴安危兩途爾宜自擇至是詔入諸將銳攻不可遏太宗麾衆少退是夕繼元遣其客省使李勲奉表請降太宗賜

勲襲衣金帶銀器錦綵銀鞍勒馬復遣通事舍人薛文寶齎詔答之夜漏未盡太宗幸城北張樂晏從臣於城臺繼元率官屬縞衣紗帽待罪臺下詔釋之

金太宗時河東郡縣多叛固雲復攻沁州飛砲擊其右脇昇歸營中諸軍復攻沁州三日不能下別將古納強起固雲指揮士卒遂克之興定元年九月癸巳元兵攻陷沁州元光二年上黨公張開請升澤沁為節鎮沁州名義勝軍置節度使 元都元帥杜豐取

沁州由是銅鞮武鄉襄垣綿山沁源諸縣皆下復撫
定遼沁未降山寨所至悉平庚寅國王博囉由雲中
圍絳州金將武仙退保潞東十餘里原上博囉馳至
沁南未立鼓赫舍哩引兵襲其後博囉戰失利輜重
人口皆陷沒至正十七年六月關先生破頭潘馮長
舅沙劉二王士誠趨晉冀十八年關先生破頭潘等
又分其軍為二一出絳州一出沁州踰太行破遼州
潞州遂陷冀寧掠大同興和塞外諸郡明崇禎五

年十二月總督張宗衡巡撫許鼎臣同逐賊臨縣賊轉入磨盤山山方六百里賊閭正虎據交城文水以窺太原邢滿川上天龍據吳城向陽以窺汾州紫金梁以秦豫毛兵俱集澤潞東南遂乘虛從沁州而北入榆次又入壽陽距太原不五十里鼎臣撤師北歸時賊首亂世王與紫金梁爭一掠婦構小隙遣其弟混天王來歸廷議方督進討諸將諱言受降權辭謝之約得紫金梁始為請於朝混天王唯唯泣涕而去

亂世王與破甲錐合謀圖紫金梁賊分為三陷霍垣
曲長子諸縣壬辰陷遼州是日除夕也

沁源縣

周建德五年柱國達奚震率步騎一萬守統軍川攻克
義寧烏蘇二鎮 明嘉靖十三年流賊掠縣三十九
年賊楊甫聚衆作亂守禦副千戶楊復楚死焉四十
一年巡撫標兵平之崇禎五年四月流寇入東關六
年正月流寇大掠七年遊擊猛如虎勦沁源賊馘五

條龍

武鄉縣

東觀漢記更始敗訛言隨赤眉在北行大將軍事鮑永
遣弟升及子壻張舒等謀使營尉李匡先反涅城開
門內兵殺其縣長馮晏立故謁者祝回為涅長 魏
太昌元年七月壬寅齊獻武王率衆入滏口大都督
庫狄干入井陘討爾朱兆庚戌詔高隆之為北道行
臺率步騎十萬趨太行會軍獻武王次於武鄉兆大

掠晉陽北走秀容并州平 唐會昌三年劉稹令都
將康良佺守武鄉河東節度使劉沔壁榆社守鼎車
關詔沔自將取關以臨賊境後兵馬使王逢擊敗良
佺良佺棄石會關屯鼓腰嶺石會關復降於稹及稹
勢蹙潞臬將白惟信自武鄉殺良佺降昭義節度使
盧鈞 梁氏叔琮自太行入取澤潞出石會營於洞
渦久之糧盡乃旋 梁兵圍太原大疫氏叔琮班師
令曰病不能行者焚之病者懼皆言無恙乃以精卒

為殿而還至石會留數騎以大將旗幟立於高岡晉
兵疑其有伏乃不敢追 明嘉靖二十一年七月俺
答抵城下隆慶元年九月寇至南關崇禎五年十月
流賊至城下發紅夷砲四位擊之賊多斃五年九月
巡撫宋統殷潛令賀人龍由介休靈石進平陽艾萬
年入黃蘆嶺李卑人文峪口分道決鬪宣大總督張
宗衡怒三將從鼎臣檄之還三將莫知適從賊遂轉
入磨盤山山方廣六百里賊紮金梁等以衆十餘萬

踞其中瞰秦豫兵盡聚澤潞東南乃乘虛突犯東北
從沁州武縣以陷遼州時舊帥尤世祿病宗衡強起
之使率人龍輩赴援六年正月復其城四月紫金梁
老回回自榆社走武鄉過天星走高澤山總兵曹文
詔皆擊破之

國朝順治六年土賊多應姜逆掠質殆罄旋即殲滅
平定州

趙武靈王二十一年攻中山趙招為右軍許鈞為左軍

公子章為中軍王并將之牛翦將車騎趙希並將胡代趙與之陁合軍曲陽攻取丹邱華陽鵠之塞王軍取鄯石邑封龍東垣中山獻四邑和王許之罷兵

後魏太安二年正月丁零數千家亡匿井陘山聚為寇盜詔定州刺史許宗之并州刺史乞佛成龍討平之趙郡李慙少有大志孝昌末潛居林慮山觀候時變葛榮之亂除奉車都尉持節鎮汴河汴河在鄴之西北重山之中并相二州交境以榮南逼故用慙

鎮之榮遣其叔樂陵王葛萇率精騎一萬擊愍愍據險拒戰萇不得前爾朱榮至東關愍乃見榮榮欲分賊勢遣愍別道向襄國襲賊署廣州刺史田怙愍未至襄國已擒榮即表分廣平易陽襄國南趙郡之中邱三縣為易陽郡以愍為太守永安末假平北將軍持節當郡大都督遷樂平太守未之郡洛京傾覆愍率所部西保石門山潛與幽州刺史劉靈助及高昂兄弟安州刺史盧曹等同契義舉靈助敗愍遂入石

門高祖建義以書招愍愍奉書擁衆數千人以赴高
祖除相州刺史令愍率本衆西還舊鎮愍至鄉據馬
鞍山依險為壘徵糧集兵以為聲勢爾朱兆出井陘
高祖破兆於廣阿愍統其本衆屯故城以備兆相州
既平命愍還鄴除西南道行臺復屯故城兆將至乃
徵愍參守鄴城 杜洛周阻兵幽定葛榮據有冀瀛
爾朱榮謂賀拔勝曰井陘險要我之東門意欲屈君
鎮之乃表勝為鎮遠將軍別將領步騎五千鎮井陘

隋末并州人王君廓掠邯鄲王君愕說曰井陘之險可先取君廓從其言遂屯井陘山高祖入關君愕與君廓偕來附唐党項羌叛河東節度使盧鈞使判官盧簡方督兵乘邊旁河相險集樹堡鄣自神山至鹿泉縣三百里扈遏其衝賊不得騁候邏便之

唐至德二載史思明與蔡希德高秀巖合兵攻太原時李光弼使部將張奉璋以兵守故關思明攻陷之奉璋走樂平思明取攻具山東奉璋匿士廣陽改服

紹為賊使者責其後期斬數人引衆還太原 宋乾
德元年北漢天會八年也八月北漢靜陽十八砦俱
來降四年二月安國軍節度使羅彥瓌等敗北漢于
靜陽殺千餘人擒其將鹿英獲馬三百匹 靖康後
信王榛從北行至慶源亡匿正定境時馬擴與趙邦
傑聚兵保五馬山砦陰迎榛歸奉之兩河遺民聞風
響應榛遣擴詣行在奏曰山西諸砦鄉兵約十餘萬
力與賊抗但皆苦官兼闕戎器惟望遣兵來援願委

臣總大軍與諸砦鄉兵約日大舉黃潛善汪伯彥疑之密令擴幾察榛復令擴聽諸路節制擴遂留大名金人恐擴以援兵至急發兵攻諸砦斷其汲道諸砦遂陷榛亡不知所在 金崇慶二年道路梗塞左都監富察阿里率師繇太原至正定赴援抵中山不克進貞祐四年七月宣撫使完顏伯嘉去太原後完顏琢寓軍平定石仁寨權平定州刺史范鐸以閭德用充本州提控德用桀驁蓄姦謀鐸不能制委曲容庇

之興定二年德用率所部掩襲殺琢及官屬程桂等
百餘人遂據石仁寨鐸懼挈家奔太原閻德用遂據
平定州十月詔誅范鐸興定元年四月戊午平定州
賊閻德用之黨閻顯殺德用以其衆降四年封武仙
為恒山公以平定州抱犢寨隸焉 元至正十八年
九月壬戌平定州陷 明崇禎六年二月巡撫許鼎
臣都督同知曹文詔屯平定總兵張應昌屯汾州駐
太原東西以禦寇

壽陽縣

晉代公猗盧遣子六修為前鋒與衛雄范班箕澹等救
晉并州刺史劉琨猗盧統兵為後繼劉粲懼焚燒輜
重突圍走縱騎追之殺傷甚衆猗盧因大獵於壽陽
山陳閱皮肉山為之盡赤 後周建德六年壽陽劉
叔仁作亂上儀同三司楊文思嘗從拔晉州命從清
河公宇文神舉討之戰於塽井在陣生擒叔仁又別
從王誼破賊于鯉魚柵十二月己未東壽陽土人反

率衆五千襲并州城刺史東平公宇文神舉討平之
宋開寶九年十月庚子鎮州巡檢郭進焚壽陽縣
俘九千人靖康元年四月种師中復壽陽五月辛未
抵壽陽之石坑 金尼楚赫圍太原宋統制劉臻救
太原率衆十萬出壽陽羅索擊破之繼敗宋兵數千
於榆次後富察降壽陽 元辛巳三月金兵攻壽陽
縣王胡莊垂破時太原城中卒不滿百都元帥哈喇
巴圖夜半引甲騎十餘人救之道三交見金兵舉烽

東西兩山哈喇巴圖趨之大戰天將明金兵遁去擣
太原之虛由西門俘獲哈喇巴圖聞之徑趨西山復
奪以還 明嘉靖二十年八月蒙古大入屠壽陽丁
數萬時有白鳥隨之人異焉崇禎二年流寇混世王
一斗穀等掠至長榆諸村六年掠古城巡撫吳姓遣
副總兵曹文詔掩擊大敗之六年正月臨洮總兵曹
文詔敗賊孟縣追及於壽陽巡撫許鼎臣遣謀士張
宰先大軍嘗賊賊驚潰六月文詔追擊之斬混世王

金史卷之八十四 卷五十四
於碧霞村餘黨為猛如虎逐走遇文詔兵方山復敗
又與陳國威馬杰破來遠寨從文詔大破賊范村國
威以步卒三百夜擊賊紅山嶺如虎杰及虎大威和
應詔擊殺九條龍

孟縣

周顯德元年都部署符彥卿駐忻口又下孟縣 宋太
平興國四年四月庚戌孟縣降壬戌帝乃發鎮州靖
康中金兵圍孟縣踰年主簿攝縣事祝公明率保甲

入城堅守城陷死之 遼將劉操守孟口後成道世
所傳劉海蟾也 金興定中升孟州聽絳州元帥府
節制 元壬午秋七月穆呼哩由雲中攻下孟州四
蹄寨遷其民於州拔晉陽義和寨癸未太原諸邑皆
平惟石家昂及孟州陵井寨忻州清泉寨為唇齒皆
未下甲申六月將兵至陵井遣卒叩寨門詐曰納糧
芻守者弗悟門啟徑入蹂踐之衆潰其酋長走石家
昂遂平陵井寨乙酉二月清泉寨酋長王穀降石家

昂亦降至元二十七年十月甲辰朔貊高以兵入山
西定孟州忻州下崞州

國朝順治四年九月縣賊李化龍攻南門俄見小坪嶺
旗颺賊輟攻迎敵敗遁問之乃守道王鏞參將李好
賢援勦也

樂平縣

晉汲桑石勒為苟晞所敗勒奔樂平時胡部大張匍督
馮突莫等擁衆數千壁於上黨勒往從之深為所昵

因說旬督隨勒歸元海烏丸張伏利度亦有衆二千
壁於樂平元海屢招而不能致勒偽得罪於元海奔
伏利度結為兄弟勒知衆心附已乃因會執伏利度
率其部衆歸元海石勒敗箕澹遷陽曲樂平戶於襄
國置守宰而還石勒攻樂平太守韓據請救於并州
刺史劉琨琨新得代公猗盧衆三萬人馬牛羊十萬
欲因其銳以威勒箕澹諫曰此雖晉人久在荒裔未
習思信難以法御今內收餘穀外抄牛羊且閉關守

險務農息士既服化感義然後用之則功可立也琨
不從悉發其衆命澹領步騎二萬為前驅琨自為後
繼勒先據險要設伏以擊澹大敗之一軍皆沒并土
震駭 劉琨遣樂平太守焦球攻石勒常山斬其太
守邢泰 石勒攻樂平太守韓據於玷城劉琨遣將
軍箕澹率衆十餘萬討勒琨次廣牧為澹聲援勒將
拒之或諫曰澹兵精盛其鋒不可當宜深溝高壘以
挫其銳攻守勢與必獲萬全勒曰澹大衆遠來體疲

力竭號令不齊可一戰而擒之何強之有寇已垂至胡可捨去大軍一動豈易中還若澹乘我之退顧乃無暇焉得深溝高壘乎此為不戰而自滅亡之道立斬諫者以孔萇為前軍都督令三軍後出者斬設疑兵於山上分為二伏勒輕騎與澹戰偽收衆而北澹縱兵追之勒前後伏發夾擊澹軍大敗獲鎧馬萬匹澹奔代郡據奔劉琨琨長史李引以并州降勒琨遂奔於段匹磾後魏泰常二年十一月司徒長孫嵩

等自畔城還至樂平詔嵩遣娥清周幾等與叔孫建
討西山丁零翟蜀洛支等悉滅餘黨而還高宗時丁
零數千家寇竊并定都昌侯陸真與并州刺史乞伏
成龍樂平東入與定州刺史許崇之併力討滅宋
建隆三年北漢天會七年也八月宋邢州王全斌攻
樂平拱衛指揮使王超散指揮使元威侯霸榮率所
部千八百人降之侍衛都指揮使蔚進馬軍都指揮
使郝貴超與遼悉兵往救三戰皆敗績樂平遂陷宋

改樂平為平晉軍以降卒為效順軍賜以錢帛由是
靜陽十八砦相率降宋九月北漢以遼兵攻平晉軍
宋洺州防禦使充西山巡檢郭進將兵來擊遼兵遂
引歸 乾德元年北漢天會八年也節度王全斌與
洺州防禦郭進等率兵入太原境俘數千人以歸遂
進克樂平乾德初初克遼州河東召遼兵六萬騎東
攻平晉左神武將軍曹彬與李繼勳等大敗之於城
下乾德三年北漢天會十年也正月節度使羅彥瓌

敗北漢兵於靜陽執守將鹿英以歸 金攻太原富
察取平定軍及樂平 明崇禎六年七月丙申流賊
陷城遊擊猛如虎與虎大威和應詔馬杰繇臯落山
勦賊有功

忻州

魏嘉平三年雍州刺史陳泰求敕并州并力討諸葛恪
司馬景王從之未集而鴈門新興二郡以為將遠役
遂驚反景王謝朝士曰此我過也非元伯之責 後

魏肅宗正光五年八月秀容內附乞扶莫於破郡殺
太守南秀容牧子萬子乞真反叛殺太僕卿陸延并
州牧子素和婆嶮嶮作亂領民酋長爾朱榮並前後
討平之爾朱榮兵威漸盛曾經肆州刺史尉慶賓
畏惡之據城不出榮恨慶賓舉兵襲之慶賓別駕姚
和內應榮遂害慶賓僚屬拘慶賓還秀容唐垂拱
二年骨咄祿入朔代以淳于處平為陽曲道總管將
擊賊總材山至忻州與賊遇鏖戰不利死者五千人

晉開運元年正月辛丑北京留守劉知遠及契丹
偉王戰於秀容敗之十一月辛卯忻州言與契丹戰
破之關南言破契丹斬首萬餘級周世宗至太原
城下命行營都部署符彥卿與郭從義向訓白重贊
史彥超率萬騎屯忻口以拒北援又下孟縣遼人駐
忻北游騎及近郊彥超以二千騎當其鋒左右馳擊
彥超死之敗遼衆二千餘遼騎遁走先鋒為遼人所
掩重傷數百人遼會同七年正月丙子明王安端

先入鴈門圍忻代下之遼應歷時周人侵漢以南院
大王特烈都統西南道軍援之周已下太原數城漢
人不敢戰及聞特烈兵至周主遣郭從義尚鈞等率
精騎拒於忻口特烈擊敗之獲其將史彥超周軍遁
歸復所陷城邑漢主詣特烈謝 宋宣和七年九月
河東言金尼瑪哈至雲中詔童貫復宣撫十二月乙丑
貫至太原遁歸是月金兵陷忻代等州圍太原府
元太祖十三年八月穆呼哩自京入河東克太原平

陽及忻代澤潞汾霍等州至正十八年六月闕先生
掠晉冀鴈門間

定襄縣

石季龍將李厯張平高昌等並率所部稱藩於慕容儁
呂護之走野王遣弟奉表謝罪於儁又上黨馮鴛自
稱太守附於張平儁以平故赦其罪以為京兆太守
護之鴛亦陰通晉張平跨有新興鴈門西河太原上
黨上郡之地壘壁三百餘衆十餘萬戶遂拜置征鎮

為鼎峙之勢僞遣慕容評攻平慕容根攻鵞陽鵞攻
昌慕容臧攻厯并州壘壁降者百餘所以悅綰為并
州刺史以撫之平所署征西諸葛驤鎮北蘇象寧東
喬庶鎮南石賢等率壘壁百三十八降於僞僞大悅
皆復其官爵既而平率衆三千奔平陽鵞奔野王厯
走滎陽昌奔邵陵悉降其衆 明正德九年火節寇
入嘉靖二十年諳達入至汾沁還三十九年寇入攻
破蕎麥寨四十年土賊夜藏段木山晝出擄掠兵巡

道王喬年及常叅將設計誘之夜發兵擒獲四十餘人餘黨悉解散崇禎中賊高加計據竒嵐四出剽掠八年三月叅將虎大威與遊擊猛如虎追至忻代山中加計馬上舞三十斤長挺突陣大威射殺之追斬其衆五百人餘黨悉平甲申二月十七日偽官曹至五月遊兵殺偽典史解二十二日流賊急圍城午刻破殺戮不可勝計

國朝順治元年五臺賊張五桂攻城偽將柳同春據忻

州兼轄定襄聞代州已歸正潰走

靜樂縣

宋靖康末太原義士張橫有衆二千往來嵐憲間紹興
五年九月敗金人於憲州後卒陷於金 金平汴諸
將西趣陝津略定河東郡縣托克索取憲州遇其援
軍擊敗之生擒其將貝勒諾果珠魯等 明洪武初
元四大王結寨於靜樂奇嵐山中三年又寇武州嘉
靖十五年十月諳達由巖頭溝至寧化三馬營三十

四年馬邑生員張蕙自北界歸言邱富日夜道詣達
靜樂縣妖人盧山佛等許為內應總督許論上其事
以蕙為所鎮撫

國朝順治六年三月姜建勲由靜樂西山下取汾州交
山土寇無事為民有事為賊丁丑夏擾靜樂疆西遷
永寧界骨集山蹂躪寧鄉臨縣巡撫倭親率兵半勦
半撫賊乃散

代州

漢高帝六年寇由鴈門圍韓王信於太原景帝中六年入至武泉吏卒戰死者二千餘人後二年入寇太守馮敬戰死發車騎材官屯元光元年十一月車騎將軍程不識屯鴈門五年正月治鴈門險阻以止寇之驅役丁男萬餘元朔元年秋車騎將軍衛青出鴈門李息出代天漢三年秋寇入鴈門太守坐畏懦誅四年正月因杆將軍公孫敖萬騎步兵三萬人出鴈門與左賢王戰不利引還偽新初始元年六月代郡

兵起 漢建武五年十二月盧芳入掠鴈門諸城下之置守令七年遣驃騎將軍杜茂墾晉陽廣武間田以驢牛轉運邊土稍給十二年又遣謁者段忠將諸郡弛刑配茂營增屯永平五年十二月寇自雲中至原陽永初三年九月烏桓居鴈門者率衆王無何允與南匈奴鮮卑合兵寇五原遼東太守耿夔將遼東鮮卑及諸郡兵與車騎將軍何熙共討之永壽二年鮮卑檀石槐入鴈門殺數百人大抄掠而去延熹二

年春二月鮮卑寇鴈門熹平六年南單于與中郎將臧旻出鴈門擊鮮卑檀石槐大敗而還 蜀漢章武

二年鮮卑大人步度根與軻比能有隙將其衆萬餘

入魏塞保鴈門建興三年魏牽招為鴈門太守教民

戰陣表復郡中烏桓五百餘家租調使為偵候鮮卑

每犯塞輒摧破之十一年十月鮮卑步度根入寇

詳寧

武魏驍騎將軍秦朗擊敗之乃詣并州降 晉代公

猗盧三年白部大人叛入西河鐵弗劉虎舉衆於鴈

門以應之攻晉新興鴈門二郡并州刺史劉琨來乞
師猗盧使弟子鬱律將騎二萬助琨擊之大破白部
次攻劉虎屠其營虎收餘燼西渡河 梁承聖三年
五月柔然入寇魏柱國趙貴擊破之 北齊天保五
年四月柔然攻肆州齊主追至恒州敗之 隋仁壽
四年八月漢王將喬鍾葵圍代州詔朔州總管楊義
臣救之義臣率馬步二萬夜出西陁遲明行數十里
鍾葵覘見義臣兵少悉衆拒之鍾葵亞將王拔驍勇

善用稍射之者不能中每以數騎陷陣義臣募能當
拔者車騎將軍楊思恩請當之義臣見思恩氣貌雄
勇顧之曰壯士也賜以卮酒思恩望見拔立陣後投
觴於地策馬赴之不克義臣復選騎士十餘人從之
思恩遂突擊殺數人直至拔麾下短兵方接所從騎
士退思恩為拔所殺拔遂乘之義臣軍北者十餘里
於是構得思恩屍義臣哭之甚慟三軍莫不下泣所
從騎士皆腰斬義臣自以兵少悉取軍中牛驢得數

千頭復令兵數百人持一鼓潛驅之澗谷間出其不意晡後與鍾葵軍戰兵初合命驅牛驢者疾進一時鳴鼓塵埃漲天鍾葵軍不知以為伏兵發因而大潰縱擊破之仁壽末漢王諒起兵并州代州總管李景發兵拒之諒遣劉嵩襲景戰於城東升樓射之無不應弦而倒選壯士擊之斬獲略盡諒復遣嵐州刺史喬鍾葵率勁卒三萬攻之景戰士不過數千加以城池不固為賊衝擊崩毀相繼景且戰且築士卒皆殊

死鬪屢挫賊鋒司馬馮孝慈司法參軍呂玉並驍勇
善戰儀同三司侯莫陳乂多謀畫工拒守之術景知
將士可用其後推誠於此三人無所闕預在閤持重
時出撫循而已月餘朔州總管楊義臣以兵來援合
擊大破之大業十三年郡丞陳孝意與虎賁郎將王
智辨討劉武周戰於下館敗績退保鴈門武周百計
攻之城申食盡校尉張倫殺孝意城遂陷唐武德
二年四月劉武周入鴈門至雀鼠谷栢壁唐初苑

君璋統劉武周部曲與高滿政夜襲代州不克又寇
代州刺史王孝德設拒却之四年頡利率萬騎與苑
君璋合寇鴈門定襄王李大恩擊却之又寇代州敗
行軍總管永安王孝基略河東郡頡利率十五萬騎
入鴈門圍并州深鈔汾潞取男女五千秦王出蒲州
邀擊之李子和以兵趨雲中掩可汗後段德操出夏
州阻其歸并州總管襄邑王神符戰汾東斬級五百
取馬二千汾州刺史蕭顗獻俘五千頡利聞秦王且

至引出塞五年八月頡利將十五萬騎入鴈門寇并
州詔太子建成秦王世民禦之時帝與羣臣議和戰
孰利鄭元璫曰戰則禍深不若和利封德彝曰不戰
而和示之以弱後當復來不若擊之而勝則和
可久矣從之後唐兵屢勝頡利結好歸後晉開運
元年正月契丹入雁門攻代州九月代州刺史白文
珂及契丹戰於七里烽敗之後晉天福十二年二
月武節都指揮使史弘肇取代州殺其刺史王暉

宋太平興國五年遼乾亨二年也三月代州言宣徽南院使潘美大敗遼衆於雁門殺其駙馬侍中蕭咄李獲都指揮使李重誨七年五月三交行營言潘美敗遼師於雁門破其壘三十六雍熙三年遼統和四年也正月雲應朔都部署潘美雲州觀察使楊業出塞五月潘美師還雲朔諸州吏民內徙宋平河東命曹光實為汾遼石沁等州都巡檢使大軍北征與潘美分道出雁門光實為前鋒遇敵迎戰敗之斬首

數千級 金大安三年元兵至忻代貞祐四年正月
壬申太原元帥監軍烏庫哩德升招其民降北者得
四千三百三十餘人三月金徙武朔吏民於嵐石九
月元攻代州經略使鄂屯醜和尚戰沒十二月壬申
元兵進自代州神仙橫城及平定承天鎮諸隘攻太
原府宣撫使烏庫哩禮遣人間道齎書至汴告急
詔發潞州元帥府平陽河中絳孟宣撫司兵援之興
定元年二月己未元兵徇忻代 元天厯元年雁門

崞縣及武嵐州大澗諸處皆穿塹壘石至正十八年
二月田豐掠雁門十九年二月博囉特穆爾過代州
收山東潰將孟本州諸軍明洪武三年延安侯唐
勝宗吉安侯陸仲亨捕代縣寇同復爵四年吉安侯
陸仲亨屯鴈門關八年都督何文輝屯鴈門關正統
十四年額森入留代州五日景泰元年額森數萬騎
攻鴈門都指揮李端擊却之復侵關南端力拒不得
過尋繇義井堡圍忻代諸州石亨等不能禦長驅抵

太原城北山西大震命巡撫朱鑑移鎮鴈門而別遣都督僉事王良鎮太原援兵漸集寇亦饜乃引去天順四年秋博囉大舉入寇鎮大同高陽伯李文按兵不戰遂入鴈門大掠忻代諸州畿輔震恐文宥死立功八月都督顏彪馮宗屯鴈門關成化八年九月火節自馬峪口入正德七年十二月總兵神周敗績於柞子塢死者甚衆九年由陽房口入至太原由石硤口出嘉靖二十年諳達由代州至太原二十一年入

代州三關不支四月詔宣大總督翟鵬兼節制鴈門
偏頭寧武二十二年入代州至太原三十二年九月
寇代州村堡都御史趙時春親率兵禦之戰於東十
里鋪總兵李涑乘勝入寇伏中與其子松死之遂寇
忻崞歸又以兵邀之四十年入代州破西郭焚之代
櫻城自守四十一年破代州平城堡堡東距代五里
隆慶元年九月破石州游騎逼忻崞代州戒嚴寇憚
度鴈門復趨石州還崇禎甲申二月闖賊至忻州官

民迎降遂攻代州五臺官吏迎降總兵周遇吉守代州出奇奮擊連戰十餘日殺賊萬餘賊合諸路賊進攻遇吉兵少食盡退守寧武關

五臺縣

晉時鐵弗帥劉氏居於新興慮虎之北後魏神麌元年六月并州卜田謀反伏誅餘衆不安詔淮南公王倍斤鎮慮虎撫慰之宋乾德五年北漢天會十一年也五月北漢鳩唐砮招收指揮使樊暉以砮來降

靖康時宣撫副使劉韜遣別將賈瓊自代州出敵背
且許義軍以爵祿得首領數十既復五臺而解潛折
可求敗聞遂不果進 金天會四年楊瑪呼等聚衆
數千於五臺鎮代州郭企忠與同知州事德濟擊平
之金圍太原郭企忠殲宋軍於五臺貞祐四年河東
行省胥鼎奏言河東北路宣撫使完顏伯嘉屢言同
知西京留守兼臺州刺史完顏琢可倚之以復山西
朝廷遷官賜姓令乚代北扼太和嶺今聞諸隘悉無

琢兵蓋琢挈太原之衆保五臺剽掠耳如尚以伯嘉之言為可信乞遣琢出太原或徙之內地分處其衆以備不測之變宰臣奏已遣官體究琢軍且令太原元帥府烏庫哩德升召琢使之矣當以此意報鼎無何德升奏琢兵數萬分屯代州諸險拒戰甚力其衆烏合非琢不可制胥鼎復奏宣差提控爪爾佳實倫言琢方招降人謀復山西盤桓於忻代定襄間恣為侵擾無復行意發掘民粟戕殺無辜雖曰不煩官廩

博易為名實則攘劫欺國害民無如琢者實倫之言
如此臣已令帥府禁止之矣宰臣奏所遣官自忻代
來云不見劫掠之迹惟如德升言便從之 元至正
二十年王士誠久躡晉冀博囉敗之於臺州乃走東
平

繁峙縣

漢高帝七年十月周勃等從帝擊破韓王信軍降後人
遂至武泉建武十年上谷太守王霸等戰勝賈覽於

平城下還合諸將入鴈門與驃騎大將軍杜茂會攻
盧芳將尹由於崞繁峙不克 晉太元元年十二月
劉庫仁遣妻兄公孫希擊破慕容垂將平規復大舉
救苻丕發上谷及代鴈門兵次於繁峙慕容文等思
東歸率三郡人攻殺庫仁

國朝順治六年賊劉遷據城焚學官兵收捕之

崞縣

漢將軍周勃下晉陽復擊韓信軍於硤石破之追北八

十里還攻樓煩二城因擊平城下所將卒當馳道為
多又擊陳豨屠馬邑所將卒斬豨將軍乘馬降轉擊
韓信陳豨趙利軍於樓煩破之得豨將宋最鴈門守
圉因轉攻得雲中守邀丞相箕隸將軍博定鴈門郡
十七縣雲中郡十二縣 隋大業十一年八月始畢
圍鴈門諸屬城皆破惟崞城守時齊王暕以後軍保
崞城 宋宣和末李翼為代州西路都巡檢使屯崞
縣金人取代遣使諭降翼射却之帥士卒堅守義勝

軍統領崔忠殺都監張洪輔夜引金兵入城翼挺身搏戰達旦力不敵被執與縣令李聳丞王唐臣尉劉子英監酒閭誠將官折可與同死之 金大安三年

元師大掠崞縣 元致和元年九月上都諸王呼喇

台等引兵犯崞州至正十八年賊將關先生大掠

明洪武元年大將軍徐達下太原遣副將軍常遇春取崞不下退屯於萬家街歛兵十日不出一夕舉火燒萬家街火光燭天城中莫測所為遇春潛燒北門

入城州守冒烟遁大都督府副使顧時從大軍取平陽克崞州獲逃將王信等嘉靖三十九年諳達掠崞攻陷原平南陽等一十七堡崇禎六年二月副總兵曹文詔連敗流賊於忻代間癸丑進都督同知七年副總兵劉光祥敗賊崞縣復其城

保德州

漢元光元年七月虔人羌攻穀羅城度遼將軍耿夔討破之

章懷注穀羅屬西河郡

延熹四年冬十月先零沈底羌與

諸種羗寇并涼二州 周顯德中折德扆節度永安
軍率師攻下河市鎮斬并軍五百餘級入朝以其弟
德權總州事又破并軍五百餘於沙谷砦斬其將郝
章張昭 宋大中祥符三年麟府言社慶族依唐龍
鎮為援數擾別部請出兵襲之上曰均吾民也不許
金興定三年六月保德州振威軍萬戶王章弩軍
萬戶齊鎮殺其刺史富珠哩尼楚格而仍滅其家脅官
吏軍民同狀白嵐州帥府言尼楚格謀不軌鎮西軍

節度使果爾嘉實倫察令同知州事富拉塔圖之富拉塔乃與兵吏置酒召章等飲擒而族誅之命行省胥鼎量宜遷賞仍令富拉塔攝州事撫安其衆

金貝勒諾果珠魯等攻保德未下托克索進兵助擊梯衝並進遂克其城 明洪武六年北兵先後入白

登保德與河曲輒為守將所敗正統四年十月威喇至西莊村烏梁海三千餘人在櫃子山屯駐殺掠保德州河曲等縣景泰元年四月諜報額森追石亨於

鴈門請令延綏總兵渡河於保德州設伏截殺從之
七月掠河曲保德成化十五年火篩由偏關至王家
寨正德十一年至東南大塔鋪嘉靖十八年諳達至
城下四十一年至董家梁賈家梁東溝四十三年由
河西五虎山下踏冰橋入把總王宰兵三百殲焉由
偏關至東南栢森村叢林村趙家塢及城沙坪演武
亭南關四十五年由唐家會踏冰入千戶徐堯臣兵
百餘殲焉數日由賈家灣踏冰入至馮家川村落無

烟隆慶元年十月自河曲保德入汾石崇禎三年府
谷賊熾

國朝順治七年守備牛化麟據城 王師破之十四年
朱龍黨周四據府谷知州李遇時等固守

河曲縣

唐開元四年突厥降戶處河曲者多北歸毗伽可汗朔
方總管薛納討平之 天寶十四載郭子儀擊高秀
巖於河曲敗之遂收雲中馬邑 宋端拱元年三月

火山軍言河西羌部直蕩族內附 何灌知火山軍
賈胡曠有水泉遼人常越境來汲灌遏其來遼將忿
而舉兵灌迎高射之發輒中著崖石皆沒鏃乃斂兵
遼神冊元年攻振武乘勝而東攻蔚新武媯儒五
州俘獲不可勝記斬不從命者萬四千七百級盡有
代北河曲陰山之衆遂取山北八軍 金海陵時火
山賊李鐵槍乘暑攻震武軍節度使布薩忠義單衣
從一騎迎擊之射殺數人賊乃退興定元年七月癸

未隰州振威軍萬戶馬寬逐其刺史李策據城叛遣使招之乃降已而復謀變州吏擒戮之夷其族四年五月癸卯元兵徇隰州正大二年五月壬申詔諭隰州趙甫等能以土地來歸當任使之元至元二十四年河南省右丞魏賽音布哈鎮偏頭關窮逐博囉特穆爾於漠北明景泰元年額森犯河曲及義井堡殺二指揮成化元年火節至楊勉堡十九年春正月又至楊勉堡弘治十四年至七里溝入至唐家會

崇禎元年黃甫川賊王嘉孕吳廷貴踏水掠河曲鄉
村三年六月署縣張文憲賄釋賊王從化十月二十
八日嘉孕陷城四年四月總督魏雲中叅政周鴻圖
銅城竭水賊渴甚乃降太原令崔從教司餉賊平署
河曲事念賊病渴潰城恐賊亦以渴制我遂建議築
南關水城三年十一月山西總兵王國樑追賊於河
曲發西洋砲砲炸兵自亂賊乘之大潰遂陷河曲四
年四月曹文詔等克河曲斬賊一千五百餘級獲兵

械馬騾數千王國棟擊王嘉孕於河曲大敗賊入據
其城部議設一大將兼統山陝軍協討乃令杜文煥
為提督偕曹文詔馳至河曲絕饟道以困之



山西通志卷五十四